

MESYUARAT KEDUA, PENGGAL PERTAMA
PARLIMEN KEEMPAT BELAS
2018

HARI KHAMIS : 6 DISEMBER 2018

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB TUAN WONG TIEN FATT @ WONG NYUK FOH

TARIKH : 06 DISEMBER 2018

SOALAN :

Tuan Wong Tien Fatt @ Wong Nyuk Foh [Sandakan] minta **MENTERI TENAGA MANUSIA** menyatakan pelan Kerajaan Persekutuan dalam usaha mengurangkan kebergantungan negara kita khasnya Sabah kepada tenaga buruh asing dalam jangka panjang. Dalam jangka pendek, adakah Kerajaan Persekutuan akan memberi kebenaran kepada buruh asing bagi memenuhi keperluan kekurangan pekerja berkemahiran rendah di seluruh Sabah.

PR-1412-L02471

JAWAPAN

Tuan Yang Di Pertua,

1. Dasar semasa Kerajaan mengenai penggajian pekerjaan ialah memberi keutamaan pekerjaan kepada rakyat tempatan termasuk di Negeri Sabah dan Sarawak. Kerajaan sentiasa berusaha untuk memastikan pekerja tempatan tidak dinafikan hak mereka untuk bekerja di dalam sektor-sektor yang dibenarkan untuk mengajikan pekerja asing. Hanya jawatan-jawatan yang tidak dapat diisi oleh pekerja tempatan dalam sektor-sektor yang diluluskan sahaja dibenarkan untuk menggaji pekerja asing.

2. Antara polisi dan inisiatif semasa yang telah dan sedang dilaksanakan oleh Kerajaan adalah seperti berikut:

- (i) menetapkan had penggajian pekerja asing di Malaysia tidak melebihi 15% daripada jumlah guna tenaga pada tahun 2020 seperti mana yang digariskan dalam Rancangan Malaysia Ke-11;
- (ii) menggalakkan sektor-sektor berintensif buruh beralih kepada penggunaan mekanisasi dan automasi bagi mengurangkan kebergantungan ke atas pekerja asing.
- (iii) penggajian pekerja asing dari mana-mana Negara sumber hendaklah berdasarkan kepada keperluan

sebenar industri dan sektor-sektor yang dibenarkan sahaja (*real industrial demand*);

- (iv) mempromosi dan memudah cara peluang penempatan pekerjaan melalui Program Penempatan Pekerjaan (3P) oleh Jabatan Tenaga Kerja untuk memberi keutamaan kepada pencari kerja tempatan secara berterusan;
- (v) penggajian pekerja asing diluluskan kepada tujuh (7) sektor sahaja iaitu pembinaan, pertanian, perladangan, perkilangan dan perkhidmatan (sub sektor tukang masak restoran, pekerja pembersihan dan pencucian, pekerja *resort* pulau peranginan, hotel, kedi, spa, urut kaki, pembantu taman tema haiwan, kargo (pelabuhan dan lapangan terbang)) dan perlombongan dan kuari yang melibatkan pekerjaan asas serta khidmat domestik;
- (vi) hanya majikan berkeupayaan (*genuine*) dan mematuhi standard perburuhan seperti pematuhan gaji minimum, menyediakan kemudahan kediaman berserta kemudahan asas dan tiada rekod pelanggaran kes buruh sahaja dipertimbangkan memohon pekerja asing. Keupayaan majikan ditentukan melalui proses saringan dan pemeriksaan Jabatan Tenaga Kerja (JTK);
- (vii) menetapkan kriteria-kriteria tertentu bagi setiap sektor yang dibenarkan dalam pemberian kuota pengambilan pekerja asing Contohnya, sektor perladangan (kelapa

sawit), keluasan tanah 8 hektar untuk 1 pekerja dan getah pula keluasan tanah 4 hektar untuk 1 pekerja. Manakala untuk sektor perkilangan, bagi syarikat dalam sub sektor elektrik dan elektronik, nisbah kelayakan yang ditetapkan adalah 2 pekerja warga negara bagi 1 pekerja asing;

- (viii) pelaksanaan Surat Aku Janji Majikan (*Employers Undertaking*) mulai 1 Januari 2017 yang mengehendaki majikan bertanggungjawab sepenuhnya terhadap pekerja asingnya bermula dari peringkat kemasukan, penggajian sehinggalah penghantaran pulang pekerja tersebut ke negara asal;
- (ix) mengutamakan *exit policy* penggajian pekerja asing dengan menyediakan pelan latihan kemahiran kepada pekerja warga negara, memberi keutamaan kepada mekanisme *Industrialised Building System (IBS)* dalam sektor pembinaan, restoran berkonsepkan *self-service* dan sebagainya;
- (x) memperkenalkan Sistem Latihan *Dual* Nasional untuk menyediakan tenaga kerja mahir negara melalui kaedah latihan industri yang komprehensif dan terkini bagi memastikan kemahiran tenaga kerja dipertingkatkan;
- (xi) Kerajaan juga telah memperkenalkan dasar TVET negara untuk warga tempatan bagi melahirkan individu

berkemahiran tinggi selaras dengan hasrat negara untuk beralih kepada industri berintensif buruh kepada *high end industry*;

(xii) pembiayaan latihan di bawah Pembangunan Sumber Manusia Berhad melalui caruman levi majikan untuk melatih semula pekerja bagi meningkatkan kemahiran pekerja terutamanya dalam sektor pembuatan, pembinaan dan perlombongan; dan

(xiii) Penguatkuasaan dipertingkatkan bagi memastikan pematuhan undang-undang perburuhan termasuk penguatkuasaan bersepadu dengan Agensi-agensi lain bagi membasmi pemerdagangan orang dan eksploitasi orang (*forced labour*).

3. Kementerian Sumber Manusia melalui Jabatan Tenaga Kerja Sabah mempunyai bidang kuasa dalam mengawal penggajian pekerja asing selaras dengan peruntukan Seksyen 118 Ordinan Buruh (Sabah Bab 67) melalui pengeluaran lesen menggaji pekerja bukan pemastautin. Walau bagaimanapun, ia masih tertakluk dengan dasar kemasukan pekerja asing dari negara sumber di bawah kawalan dan bidang kuasa kerajaan Negeri Sabah.

4. Prosedur pengambilan pekerja asing adalah diurusetikan oleh Jabatan Imigresen Malaysia Cawangan Sabah melalui beberapa Jawatankuasa: –

- (i) Jawatankuasa Panel Perunding Pengambilan Pekerja Asing Sabah (JPPPAS) (bagi pengambilan pekerja manual (buruh kasar 3D) melalui negara sumber Indonesia dan Filipina) yang terdiri daripada agensi Jabatan Tenaga Kerja Sabah, Jabatan Ketua Menteri, Kementerian Pelajaran & Inovasi Sabah, Lembaga Pembangunan Pelaburan Malaysia (MIDA) dan Jabatan Pertanian akan memutuskan kelulusan pengambilan pekerja menerusi sesi temu duga kuota setiap minggu mengikut kriteria dan garis panduan yang telah ditetapkan.

- (ii) Jawatankuasa Pegawai Dagang dan Pas Kerja Malaysia (bagi pengambilan pekerja bukan manual) yang terdiri daripada pelbagai Jabatan dan agensi seperti Jabatan Ketua Menteri, Jabatan Tenaga Kerja Sabah, MIDA serta Kementerian Pelajaran dan Inovasi Sabah. Jabatan Tenaga Kerja Sabah berperanan memastikan penggajian pekerja tempatan diutamakan di samping mengawal penggajian pekerja asing untuk sektor yang dibenarkan.

Tuan Yang Di Pertua,

5. Bagi Jawatankuasa Pemprosesan Permohonan Surat Sokongan (*Working Permit Support Committee*), jawatankuasa diurusetiaikan oleh Kementerian Pelancongan, Kebudayaan dan Alam

Sekitar negeri Sabah. Keahlian jawatankuasa adalah Jabatan Tenaga Kerja Sabah, Jabatan Ketua Menteri Sabah, Jabatan Imigresen Malaysia Cawangan Sabah, Kementerian Pelancongan dan Kebudayaan Malaysia (MOTAC), Lembaga Pelancongan Sabah (STB), *Malaysia Association of Tour and Travel Agents (MATTA)* dan *Sabah Tourism Association (STA)*.

6. Sehubungan dengan itu, Kerajaan sememangnya sentiasa memastikan pekerja warga tempatan diberi keutamaan dalam peluang pekerjaan dan pada masa yang sama, Kerajaan juga sedang meneliti pelbagai aspek dalam pengurusan pengambilan pekerja asing secara holistik supaya lebih sistematik dan berintegriti.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : DATO' SRI ISMAIL SABRI BIN YAAKOB [BERA]

TARIKH : 6 DISEMBER 2018 (KHAMIS)

SOALAN : 2

minta **MENTERI PEMBANGUNAN LUAR BANDAR** menyatakan setelah Kerajaan membatalkan projek ECRL ke Pantai Timur dan HSR ke Singapura :-

- a) adakah GiatMARA akan meneruskan kursus latihan rel bersama UMP; dan
- b) adakah UniKL akan meneruskan *Rail Institute* yang telah diwujudkan.

JAWAPAN

Tuan Yang Di-Pertua,

Untuk makluman Yang Berhormat, GIATMARA bersama beberapa institusi pendidikan tinggi dan kemahiran telah dipilih untuk melaksanakan kursus kemahiran dalam bidang sivil, elektrik dan mekanikal bagi menyediakan tenaga kerja mahir kepada industri rel.

Walau bagaimanapun, GIATMARA telah dimaklumkan oleh Universiti Malaysia Pahang (UMP) melalui surat bertarikh 14 Ogos 2018 bahawa Program Latihan Kemahiran Industri East Coast Rail Link (PLKI-ECRL)

ditangguhkan susulan penangguhan pembinaan Projek Laluan Rel Pantai Timur (ECRL).

Walau bagaimanapun, GIATMARA masih meneruskan program latihan kemahiran seperti Kursus Teknologi Kimpalan & Fabrikasi Logam serta kursus Pendawaian Elektrik yang menyokong kepada keperluan tenaga kerja mahir dalam industri teknologi rel. Pada masa sekarang, seramai 36 orang pelatih sedang mengikuti program ini dan dijangka akan menamatkan latihan pada akhir Disember 2018.

Untuk makluman Yang Berhormat juga, MARA telah menubuhkan UniKL Asia Rail Centre pada 23 Mac 2016 berpusat di Universiti Kuala Lumpur Malaysia Italy Design Institute (UniKL MIDI) di Taman Shamelin Perkasa, Kuala Lumpur.

Penangguhan projek rel seperti MyHSR dan ECRL tidak memberi kesan yang besar kepada program yang ditawarkan oleh UniKL. Kedua-dua projek ini menggunakan sistem yang berbeza iaitu Sistem *Main Line*. Namun demikian, UniKL boleh menawarkan subjek elektif bagi sistem *Main Line* sekiranya projek tersebut dilancarkan semula pada masa hadapan.

Sehingga kini, terdapat seramai 272 peserta/pelajar telah mengikuti pelbagai kursus pendek dan seminar berkaitan teknologi rel. Bagi program akademik pula, terdapat 240 orang pelajar sedang mengikuti pengajian peringkat ijazah berkaitan rel.

UniKL tetap akan meneruskan program rel sedia ada di peringkat ijazah, kursus profesional dan program jangka pendek bagi memenuhi keperluan tenaga kerja industri rel di dalam negara dan Asia.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN

**DARIPADA : YB TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 6 DISEMBER 2018 (KHAMIS)

SOALAN:

Tuan Ahmad Fahmi bin Mohamed Fadzil [Lembah Pantai] minta **PERDANA MENTERI** menyatakan langkah-langkah yang akan diambil Kerajaan untuk menjamin pusat-pusat pengajian maahad tahfiz di seluruh negara berdaftar dan terkawal dari segi keselamatan bangunan, pengajar dan terutamanya murid-murid.

JAWAPAN : **(YB HAJJAH FUZIAH SALLEH, TIMBALAN MENTERI
DI JABATAN PERDANA MENTERI)**

Tuan Yang di-Pertua,

Sebagaimana Ahli Yang Berhormat sedia maklum, semua institusi pendidikan agama termasuk sekolah-sekolah Tahfiz yang ditubuhkan oleh pelbagai pihak adalah perlu berdaftar dan tertakluk kepada Enakmen Kawalan Sekolah-Sekolah Agama atau undang-undang dan peraturan yang sedang berkuatkuasa di negeri berkenaan. Ini adalah selaras dengan ketetapan Butiran 1, Senarai Negeri, Jadual Kesembilan, Perlembagaan Persekutuan bahawa hal ehwal Islam adalah di bawah bidang kuasa pihak

NO. SOALAN: 3

berkuasa agama negeri. Oleh itu, aspek keselamatan bangunan adalah di bawah bidangkuasa negeri dan pihak agensi berkaitan seperti Jabatan Bomba dan Penyelamat dan Pihak Berkuasa Tempatan (PBT).

Penetapan syarat dan keperluan pendaftaran adalah ditetapkan oleh negeri yang mana pengelola institusi tahfiz hendaklah memenuhi syarat antaranya ialah bangunan yang menepati piawai keselamatan dan guru-guru hendaklah mendapat tauliah mengajar dari negeri.

Untuk makluman Ahli Yang Berhormat, undang-undang juga akan dipinda melalui Akta 505, pindaan kepada seksyen 97 untuk meluaskan kuasa Majlis bagi mengawal selia sekolah agama Islam dengan mewujudkan suatu kaedah untuk memasukkan definisi sekolah tahfiz sebagai sebahagian daripada definisi sekolah agama.

Justeru, bagi menjayakan hasrat ini, kerjasama dengan pelbagai agensi seperti Pihak Berkuasa Tempatan (PBT) amatlah perlu bagi menjamin pusat-pusat tahfiz yang ada pada hari ini diwajibkan berdaftar dengan agensi yang terlibat. Ini kerana, pihak PBT mempunyai kuasa untuk mengarahkan penutupan premis tersebut sekiranya terdapat apa-apa pelanggaran terutama bagi perkara berkaitan keselamatan.

Di samping itu, Kerajaan juga melalui Jabatan Kemajuan Islam Malaysia (JAKIM) mengadakan kerjasama dengan Institut Keselamatan dan Kesihatan Pekerjaan Negara (NIOSH) untuk pendedahan kepada warga institusi tahfiz mengenai amalan keselamatan di institusi tersebut melalui Kursus Keselamatan dan Kesihatan Pekerjaan untuk sekolah tahfiz. Ia bertujuan untuk memberi kefahaman dan kesedaran dalam bidang keselamatan dan kesihatan pekerjaan dengan mewujudkan persekitaran kerja yang selamat dan sihat kepada para guru, pentadbir dan murid di institusi tahfiz.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SRI HAJI FADILLAH BIN YUSOF
[PETRA JAYA]
TARIKH : 6 DISEMBER 2018 (KHAMIS)

SOALAN NO. 4

Minta **MENTERI KEWANGAN** menyatakan apakah status koridor ekonomi yang telah diwujudkan oleh pentadbiran yang lepas dan apakah perancangan Kerajaan dalam memastikan pelaburan luar terus masuk dalam merencanakan pembangunan ekonomi koridor ini.

JAWAPAN

Tuan Yang di-Pertua,

Untuk makluman Ahli Yang Berhormat, buat masa ini Pihak Berkuasa Wilayah Pembangunan Iskandar (IRDA), Pihak Berkuasa Pelaksanaan Koridor Utara (NCIA), Majlis Pembangunan Wilayah Ekonomi Pantai Timur (ECERDC), Pihak Berkuasa Pembangunan Ekonomi dan Pelaburan Sabah (SEDIA) dan Lembaga Pembangunan Koridor Wilayah (RECODA) terus berfungsi seperti biasa sebagaimana sebelum ini dan ditempatkan di bawah penyeliaan Kementerian Kewangan (MOF) melainkan keputusan sebaliknya dibuat oleh Kerajaan pada masa akan datang.

Pihak-Pihak Berkuasa Koridor akan meneruskan fungsi mereka untuk menarik pelaburan masuk ke Wilayah Ekonomi Koridor ini dengan meneruskan projek-projek pembangunan infrastruktur yang telah dirancang dan meneruskan usaha-usaha mempromosi, misi perdagangan serta penyediaan insentif-insentif untuk menarik pelabur-pelabur masuk ke Wilayah Ekonomi Koridor berkenaan.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN	:	LISAN
DARIPADA	:	TUAN AKMAL NASRULLAH BIN MOHD NASIR [JOHOR BAHRU]
TARIKH	:	6 DISEMBER 2018 (KHAMIS)
SOALAN	:	5

Tuan Akmal Nasrullah bin Mohd. Nasir [Johor Bahru] minta **PERDANA MENTERI** menyatakan langkah-langkah yang telah diambil terhadap Amanah Ikhtiar Malaysia (AIM) yang tidak memenuhi syarat-syarat Suratcara Ikatan Amanah terutamanya dalam penubuhan anak-anak syarikat.

JAWAPAN: **YB TUAN MOHAMED HANIPA BIN MAIDIN,**
TIMBALAN MENTERI
DI JABATAN PERDANA MENTERI

Tuan Yang di-Pertua,

Amanah Ikhtiar Malaysia (AIM) telah diperbadankan dibawah Akta Pemegang (Pemerbadanan) 1952 [Akta 258] pada 20 Oktober 1988 melalui Surat Ikatan Amanah asal bertarikh 17 September 1987. Objektif utama penubuhan AIM sebagaimana Surat Ikatan Amanah bertarikh 17 September 1987 adalah untuk **“membantu isirumah termiskin untuk mengeluarkan mereka daripada kemiskinan terutamanya melalui Pinjaman Ikhtiar yang digunakan untuk membiayai kegiatan yang menghasilkan pendapatan”**. Berdasarkan kepada Surat Ikatan Amanah bertarikh 26 April 2012 klausa 3(c), dibaca bersama Surat Ikatan Amanah asal menyatakan bahawa AIM *“shall not trade or engage in any form of business”*. Justeru, penubuhan anak syarikat oleh AIM adalah tidak dibenarkan.

Dalam hal ini, Menteri melalui **seksyen 17(1) (c) Akta Pemegang Amanah (Pemerbadanan) 1952 [Akta 258]** boleh **membatalkan Sijil Pemerbadanan AIM** sekiranya Yayasan didapati telah melaksanakan aktiviti/program yang bercanggah dengan objektif sebagaimana dinyatakan melalui Surat Ikatan Amanah asal dan Surat Ikatan Amanah seterusnya.

Seksyen 17(1) (c) Akta Pemegang Amanah (Pemerbadanan) 1952 Akta 258 memperuntukkan bahawa (dengan izin):

The Minister may by order revoke the certificate of incorporation if -

(c) the body or association of persons by whom the trustee constituting the body corporate are appointed is found to have pursued objectives other than those for which it originally established;

Sehubungan dengan itu, kerajaan sedang menyediakan dokumen untuk memulakan prosedur pembatalan sijil Pemerbadanan AIM mengikut **seksyen 17 (2) Akta Pemegang Amanah (Pemerbadanan) 1952 [Akta 258]**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT [JERAJ]

TARIKH : 6 DISEMBER 2018 (KHAMIS)

SOALAN NO. 6

Minta **MENTERI PENDIDIKAN** menyatakan :-

- (a) adakah pihak Kementerian meletakkan sebarang sasaran jumlah pemegang Master dan PhD yang ingin dicapai dalam tempoh beberapa tahun ; dan
- (b) apakah usaha Kementerian ke arah menambahkan jumlah pemegang Master dan PhD dalam negara.

JAWAPAN

Tuan Yang di-Pertua,

- (a) Kementerian Pendidikan Malaysia (KPM) melalui Pelan Pembangunan Pendidikan Malaysia 2015-2025 (Pendidikan Tinggi) menyasarkan sasaran 60,000 orang pemegang PhD menjelang tahun 2023.
- (b) KPM sentiasa mengambil langkah proaktif dan inovatif dalam memastikan sasaran tersebut di atas dapat dicapai antaranya melalui penawaran pelbagai skim geran penyelidikan bertujuan untuk menghasilkan bakat atau menyumbang kepada pembangunan modal insan. Skim geran penyelidikan yang ditawarkan ini merangkumi penyelidikan dalam pelbagai bidang sekaligus berupaya menghasilkan penemuan baharu yang akhirnya dapat dimanfaatkan secara terus kepada komuniti. KPM sentiasa percaya dan akan terus menyokong usaha dan semangat daya saing pelajar berkelulusan tinggi ini dalam pelbagai bidang sekaligus dapat memberi impak positif kepada kemajuan pendidikan di negara Malaysia.

Untuk makluman Ahli Yang Berhormat juga, pada masa ini, KPM menawarkan program penajaan biasiswa dan Hadiah Latihan Persekutuan di mana fokus utama penajaan ini adalah kepada tenaga pengajar akademik di Institusi Pendidikan Tinggi Awam (IPTA) dalam usaha melahirkan tenaga pengajar yang profesional dan intelek selaras dengan keperluan semasa universiti masing-masing.

Melalui usaha yang dijalankan, berdasarkan Statistik Pendidikan Tinggi yang dikeluarkan oleh KPM, pada tahun 2017, negara telah berjaya menghasilkan seramai 22,342 orang pemegang PhD warganegara Malaysia daripada IPT tempatan. Jumlah ini tidak termasuk jumlah keseluruhan pelajar PhD warganegara Malaysia yang melanjutkan pengajian PhD di luar negara. Oleh itu, jika diambil kira keseluruhan enrolmen pelajar di peringkat PhD, sasaran PPPM (PT) dalam mewujudkan 60,000 pemegang PhD menjelang tahun

2023 akan dapat dicapai sekiranya semua pelajar menamatkan pengajian dalam tempoh yang ditetapkan.

Fokus utama KPM kini adalah memastikan akauntabiliti dalam menghasilkan penyelidikan yang memberi impak maksimum kepada sistem pendidikan negara.

Justeru KPM bercadang untuk mempertingkatkan penghasilan sarjana dan PhD melalui penyaluran geran penyelidikan seperti *Fundamental Research Grant Scheme*, *Long Term Research Grant Scheme* dan *Trans Disciplinary Research Grant Scheme*.

Terbaharu, melalui Belanjawan Tahun 2019, KPM menerima sejumlah peruntukan bagi tujuan penyelidikan sebanyak RM 425 Juta berbanding RM345 Juta pada tahun 2018. Selain itu, universiti juga sentiasa mempelbagaikan inisiatif untuk menghasilkan lebih ramai Sarjana dan PhD, contohnya mewujudkan endowment atau wakaf penyelidikan. mewujudkan Kursi Jamalullail di Universiti Islam Antarabangsa Malaysia. Program ini menyediakan 50 biasiswa diRaja kepada pelajar untuk melanjutkan pengajian ke peringkat PhD dengan dana pertama sebanyak RM5 juta sebagai sokongan untuk membantu pembangunan pendidikan.

Bersesuaian dengan kemampuan kewangan negara pada masa ini, KPM sentiasa memastikan program penajaan yang dilaksanakan sejajar dengan aspirasi Kerajaan serta bersandarkan kepada dasar dan keperluan terkini guna tenaga dan keperluan bakat. Langkah ini membolehkan program penajaan lebih berfokus, inklusif, menitikberatkan kualiti berbanding kuantiti sekaligus menepati keperluan pemegang taruh semasa.

Sekian, terima kasih.

SOALAN NO: 7

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DATO' ABDULLAH SANI BIN ABDUL HAMID

TARIKH : 06 DISEMBER 2018

SOALAN :

Dato' Abdullah Sani bin Abdul Hamid [Kapar] minta **MENTERI TENAGA MANUSIA** menyatakan tindakan terhadap pemberhentian pekerja dalam masa sama masih lagi beroperasi di dalam syarikat lain.

PR-1412-L01555

JAWAPAN

Tuan Yang Di Pertua,

1. Terdapat beberapa situasi berkaitan pemberhentian pekerja, antaranya terdapat lebih pekerja (redundancy) iaitu berikutan penyusunan semula organisasi yang akan menyebabkan pembuangan pekerja, iaitu penamatan oleh majikan mana-mana pekerja yang didapati lebih daripada yang diperlukan organisasi. Pertukaran telah berlaku dalam pemilikan perniagaan bagi tujuan yang mana pekerja telah diambil kerja atau sebagai sebahagian perniagaan, tidak mengira samaada pertukaran tersebut berlaku kerana penjualan atau lain-lain sebab atau dengan sebab perundangan. Terdapat juga situasi di mana penutupan sepenuhnya perniagaan yang berpunca dari pemindahan perniagaan ke negara lain.

2. Pekerja-pekerja yang telah diberhentikan layak untuk mendapat faedah penamatan kerja yang dikira berdasarkan tempoh perkhidmatan sebagaimana dinyatakan di bawah Peraturan-peraturan Kerja (Faedah-faedah Penamatan dan Pemberhentian Kerja Sementara) 1980. Kegagalan majikan membayar faedah penamatan kerja sebagaimana yang ditetapkan oleh Akta Kerja 1955, pekerja boleh membuat tuntutan di bawah seksyen 69, Akta Kerja 1955. Kegagalan majikan mematuhi perintah yang dikeluarkan, penguatkuasaan ketidakpatuhan perintah melalui tindakan Saman

Penghutang Penghakiman (JDS) atau tindakan-tindakan penguatkuasaan lain seperti writ penyitaan (JN) dan penjualan dan tindakan pendakwaan ke atas majikan di mahkamah sivil boleh dijalankan ke atas majikan. Tindakan ini boleh diambil terhadap majikan yang masih beroperasi terhadap pemilik syarikat seperti pengarah, pengurus syarikat secara berse sama atau berasingan dengan syarikat.

3. Manakala bagi majikan yang telah disytihar bankrap atau digulung, menurut peruntukan di bawah seksyen 224 Akta Syarikat 1965 apa-apa tindakan atau pelaksanaan yang dibuat terhadap mana-mana syarikat yang telah dimulakan prosiding penggulungan adalah tidak sah. Oleh yang demikian, sekiranya terdapat tuntutan dari segi gaji tertunggak yang hendak dibuat oleh mana-mana pekerja ke atas majikan yang dalam kategori tersebut, tuntutan melalui kes buruh tidak boleh dijalankan. Dalam keadaan sebegini pekerja-pekerja dijelaskan mengenai prosedur yang boleh dibuat oleh pekerja melalui Jabatan Insolvensi atau merujuk terus kepada Pemegang Harta atau *Liquidator* yang dilantik oleh mahkamah iaitu dengan memfailkan borang Bukti Keberhutangan atau 'Proof of Debt' dan Borang 'Proxy' oleh pekerja-pekerja terlibat. Manakala bagi kes yang melibatkan syarikat perkongsian atau milikan tunggal, Akta Kebankrapan 1967 dan Kaedah-kaedah Kebankrapan 1969 adalah terpakai. Walaupun begitu, JTK akan menyerahkan Perintah dan menasihatkan peliquidasi untuk mengutamakan bayaran gaji sepertimana perintah ketua pengarah dan memberi keutamaan

sebagaimana peruntukan sub seksyen 1(c), seksyen 527, Akta Syarikat 1956..

4. Namun begitu, Malaysia mempunyai undang-undang untuk melindungi pekerja dan memastikan pembuangan kerja tidak dilakukan dengan sewenang-wenangnya. Terdapat majikan mengambil kesempatan mengambil pekerja asing sedangkan pekerja tempatan pula di berhentikan. Di bawah Akta Kerja 1955(Akta 265), seksyen 60M, memperuntukkan tiada majikan boleh menamatkan perkhidmatan pekerja tempatan dengan tujuan mengambil kerja seseorang pekerja asing. Di bawah akta yang sama, menurut seksyen 60N, sekiranya majikan dikehendaki mengurangkan tenaga kerjanya oleh sebab lebihan pekerja yang memerlukan pengurangan pekerja, maka majikan tidaklah boleh menamatkan perkhidmatan seseorang pekerja tempatan melainkan pekerja asing dalam kategori pekerjaan yang sama ditamatkan terlebih dahulu.

5. Manakala, di bawah Seksyen 20, Akta Perhubungan Perusahaan 1967 turut memberi perlindungan kepada pekerja-pekerja terhadap sebarang bentuk pembuangan kerja tanpa sebab atau tanpa alasan yang munasabah. Pekerja-pekerja yang ingin membuat *reinstatement* boleh memfailkan kes di Jabatan Perhubungan Perusahaan Malaysia (JPPM).

6. Kerajaan juga telah menguatkuasakan Akta Sistem Insurans Pekerjaan (SIP). Akta SIP adalah suatu akta baru yang memberi

perlindungan insuran kepada pekerja yang diberhentikan supaya dilindungi dan mendapat faedah sekiranya diberhentikan. Pekerja dan majikan yang mencarum di bawah skim akta ini akan dibayar faedah sebagaimana yang ditetapkan di bawah Akta. Melalui kewujudan Akta ini, pekerja akan mendapat bayaran akibat penamatan pekerjaan sewajarnya.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN AHMAD AMZAD BIN
MOHAMED@HASHIM
[KUALA TERENGGANU]
TARIKH : 06 DISEMBER 2018 (KHAMIS)

SOALAN NO. 8

Y.B. TUAN AHMAD AMZAD BIN MOHAMED@HASHIM [KUALA TERENGGANU] minta **MENTERI KEWANGAN** menyatakan statistik pemberian wang pendahuluan daripada Kerajaan Persekutuan kepada Kerajaan Negeri sehingga Jun 2018.

JAWAPAN

Tuan Yang di-Pertua,

1. Pada tahun 1981, dana Kumpulan Wang Rizab Negeri (KWRN) membiayai caruman kepada Kumpulan Wang Pendahuluan kepada Kerajaan-kerajaan Negeri di bawah Perkara 109 (6) Perlembagaan Persekutuan. Kumpulan Wang Pendahuluan ini merupakan satu kumpulan Wang dalam bentuk tabung pusingan yang bertujuan membantu negeri-negeri mengatasi masalah aliran tunai. Pemberian ini juga bertujuan untuk membantu keperluan akuan mengurus dalam tahun semasa di mana sebahagian besar adalah pembayaran gaji kakitangan kerajaan, diikuti dengan Perkhidmatan dan Bekalan.
2. Berdasarkan rekod, jumlah Kumpulan Wang Pendahuluan bagi tempoh 2013 hingga 2018 adalah sebanyak RM 1,587,248,227. Bagi tahun 2018, sehingga sekarang, negeri-negeri yang menerima Kumpulan Wang Pendahuluan adalah negeri Kelantan sebanyak RM 22,500,000 dan negeri Perlis sebanyak RM 20,500,000.

SOALAN NO. : 9

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 6 DISEMBER 2018 (KHAMIS)

SOALAN NO.9

Tuan Ahmad bin Hassan [Papar] minta **MENTERI AIR, TANAH DAN SUMBER ASLI** menyatakan apakah tindakan segera yang akan diambil oleh Kerajaan terhadap projek '*waterfront*' di Sungai Papar yang telah diluluskan peruntukannya sebanyak RM20 juta di bawah RMK-11 (JPS-Sabah) tetapi hanya berjaya disiapkan setakat 50 peratus pelaksanaannya.

SOALAN NO.9

JAWAPAN:

Tuan Yang di-Pertua,

Untuk makluman projek '*waterfront*' di Sungai Papar telah siap dilaksanakan dengan kos RM10 juta. Peruntukan RM10 juta lagi tidak dilaksanakan disebabkan oleh masalah di tapak dan keputusan telah di buat agar projek berkenaan tidak diteruskan.

Pada masa kini, Kerajaan Negeri melalui Jabatan Pengairan Dan Saliran (JPS) Sabah telah membuat permohonan semula untuk meneruskan pelaksanaan projek berkenaan. Permohonan berkenaan masih dalam pertimbangan Kementerian Air, Tanah Dan Sumber Asli untuk mendapat kelulusan daripada Kementerian Hal Ehwal Ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA HAJAH MAS ERMIEYATI BINTI
SAMSUDIN [MASJID TANAH]**

TARIKH : 6 DISEMBER 2018 (KHAMIS)

SOALAN NO. 10

Minta **MENTERI PENDIDIKAN** tindakan proaktif yang diambil oleh Kementerian dalam mengurangkan penggunaan kertas di IPT dan sekolah yang sekarang berada pada tahap yang tinggi hingga mengancam alam sekitar.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengambil langkah proaktif dengan memanfaatkan teknologi semasa melalui *Roadmap Transformasi Buku Teks 2013 - 2025* untuk mendigitalkan buku teks bercetak secara berperingkat. Sebagai permulaan, KPM telah mendigitalkan 451 buku teks bercetak dalam versi *Portable Document Format* (PDF) dan buku-buku ini telah dimuat naik dalam portal pembelajaran maya *Virtual Learning Environment* (VLE) 1Bestarinet sebagai bahan sokongan untuk kegunaan murid dan guru.

Pendigitalan buku teks dapat membudayakan *ubiquitous learning* dengan penggunaan alat peranti seperti tablet dan telefon bimbit. Inovasi pendigitalan buku teks ini juga membolehkan murid mendapatkan pengetahuan *beyond the classroom* dan juga dapat menyelesaikan masalah beg berat dalam kalangan murid-murid. Selain itu, penggunaan

buku teks digital dapat mengurangkan penggunaan kertas bagi mencetak buku teks bercetak dan seterusnya dapat mengurangkan indeks penggunaan kertas negara.

Di peringkat pendidikan tinggi pula, KPM dengan kerjasama universiti awam (UA) sentiasa menyokong aspek kelestarian hijau bagi meminimalkan impak negatif terhadap alam sekitar disamping menggalakkan penggunaan sumber yang optimum.

Pelbagai program berbentuk pemeliharaan alam sekitar atau “*Go Green*” telah dilaksanakan di UA yang bertujuan untuk mengurangkan ancaman terhadap alam sekitar. Antaranya adalah seperti pendekatan dengan mengurangkan penggunaan kertas (*paper less*) dalam pelbagai urusan dan mesyuarat, larangan menggunakan bekas polistirena di kafetaria kampus, minuman tanpa menggunakan *straw*, kempen kitar semula, aktiviti pembersihan dan gotong-royong menangani jangkitan virus aedes, penghasilan baja kompos dari sisa makanan, projek tanaman pokok dan sebagainya.

Selain itu, UA turut mengambil inisiatif dengan menubuhkan Unit Lestari Kampus (SCU), iaitu sebuah unit yang bertanggungjawab dalam perancangan, pembangunan dan pelaksanaan aktiviti “*Go Green*” di kampus UA. Penubuhan SCU sebagai pusat sehenti (*one-stop centre*) adalah bertujuan untuk memberi kesedaran kepada pelajar dalam menangani isu-isu alam sekitar melalui program berkonsepkan inovasi, kreatif dan mampan. Pendekatan ini dilihat mampu untuk memastikan keseimbangan ekosistem kampus yang lestari melalui inisiatif penghijauan kampus yang lebih agresif dan berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 6 DISEMBER 2018 (KHAMIS)

SOALAN NO. 11

Minta **MENTERI PENDIDIKAN** menyatakan insentif yang diberikan kepada golongan guru di Malaysia terutamanya ketika mengikuti khusus atau urusan rasmi luar.

JAWAPAN

Yang di-Pertua,

Untuk makluman Ahli Yang Berhormat, kepentingan dan kebajikan guru semasa menjalankan tugas rasmi sentiasa dijadikan keutamaan oleh pihak kerajaan sama seperti yang dinikmati oleh penjawat awam lain. Guru-guru yang mengikuti kursus atau urusan rasmi layak untuk membuat tuntutan elaun, kemudahan dan bayaran kerana menjalankan tugas rasmi selaras dengan Pekeliling Perbendaharaan WP1.4: Kadar dan Syarat Tuntutan Elaun, Kemudahan dan Bayaran Kepada Pegawai Perkhidmatan Awam Kerana Menjalankan Tugas Rasmi (Tidak Termasuk Tentera dan Polis).

Penjawat awam termasuk guru adalah layak untuk menuntut sekiranya mematuhi syarat-syarat yang ditetapkan. Antara elaun, kemudahan dan bayaran yang boleh dituntut sekiranya seseorang guru tersebut dikehendaki menjalankan tugas rasmi di luar ibu pejabatnya adalah seperti elaun makan, elaun harian, bayaran sewa hotel, elaun gantian tetap, elaun perjalanan kenderaan, tambang gantian, tambang pengangkutan awam dan belanja pelbagai.

Sekian, terima kasih.

RJM149

PEMBERITAHUAN PERTANYAAN LISAN
DEWAN RAKYAT MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : LISAN

DARIPADA : Y.B. TUAN CHE ALIAS BIN HAMID
[KEMAMAN]

TARIKH : 6 DISEMBER 2018 (KHAMIS)

SOALAN NO. 12

Y.B. TUAN CHE ALIAS BIN HAMID [KEMAMAN] minta **MENTERI KEWANGAN** menyatakan keberkesanan pelan penstrukturan semula Malaysia Airlines Bhd. setelah dana berjumlah RM6 bilion telah dilaburkan oleh Kerajaan.

JAWAPAN

Tuan Yang Dipertua,

Pelan Pemulihan MAS (“PPM”) yang dilancarkan pada 29 Ogos 2014 adalah pelan penstrukturan semula yang menyeluruh dan dilaksanakan dalam tempoh lima tahun untuk membina semula ikon negara menjelang tahun 2020. Sehubungan itu, hasil pelaksanaan PPM hanya akan dapat dinilai sepenuhnya selepas garis masa yang ditetapkan, iaitu pada tahun 2020.

PPM digubal dalam tiga fasa utama dengan sasaran pencapaian yang jelas seperti berikut:

- i. Fasa 1 - menyahsenarai sepenuhnya Malaysia Airlines System (MAS) dengan Khazanah mengambil alih pemilikan penuh dan MAS seterusnya melaksanakan beberapa inisiatif penambahbaikan utama;
- ii. Fasa 2 - pewujudan entiti sah baharu, Malaysia Airlines Berhad (MAB), yang mana operasi, aset dan liabiliti MAS yang berkaitan akan dipindahkan kepada entiti baharu ini; dan
- iii. Fasa 3 - fasa terakhir yang mana MAB disasarkan untuk kembali mencatatkan keuntungan menjelang penghujung 2017. Menjelang 2020 pula, Khazanah mempunyai pilihan untuk melupuskan (menjual) MAB untuk pulangan yang positif dan diharapkan dapat kembali MAB menjadi ikon kebanggaan Malaysia.

Sehingga kini, PPM telah berada dalam tahun keempat pelaksanaannya dan telah melakar beberapa hasil positif. Walau bagaimanapun, masih terdapat sasaran yang belum dicapai dan direalisasikan sepenuhnya.

Pencapaian utama yang telah dilakar setakat ini termasuk penyahsenaraian MAS, penggubalan Akta MAS, pengoperasian Malaysia Aviation Group Berhad, pelancaran pusat pembangunan korporat, penubuhan Suruhanjaya Penerbangan Malaysia, rasionalisasi laluan bagi laluan tidak menguntungkan dan pengembangan penyambungan rangkaian serantau MAB serta transformasi digital dengan pelancaran sistem perkhidmatan penumpang, laman web dan aplikasi mudah alih yang dipertingkatkan.

Dari segi kewangan, PPM masih belum mencapai sasarannya untuk mendapat pulangan modal menjelang 2018. Cabaran ini adalah disebabkan oleh pelbagai faktor termasuk kenaikan harga bahan api (meningkat lebih dari 37% tahun ke tahun), lebihan kapasiti di seluruh industri yang mengakibatkan tekanan permintaan dan hasil serta kekangan operasi dari segi kekurangan juruterbang.

Namun begitu, dalam keadaan faktor luaran yang mencabar, MAB tetap komited untuk meneruskan pelan ini melalui inisiatif yang telah dirancang dan sentiasa melaksanakan strategi proaktif dan defensif untuk meningkatkan prestasi pada tahun 2019. MAB akan terus memacu hasil dengan melaksanakan strategi penentuan harga yang efektif dan menyediakan produk yang lebih baik kepada penumpang. Malaysian Hospitality akan terus menjadi fokus dan panduan bagi syarikat bagi menjadikan MAB sebuah syarikat penerbangan yang lebih baik berbanding saingannya pada masa hadapan.

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 6 DISEMBER 2018

SOALAN : 13

Dato' Johari bin Abdul [Sungai Petani] minta **PERDANA MENTERI** menyatakan adakah Suruhanjaya Pilihan Raya akan melaksanakan persempadanan semula kawasan pilihan raya, bagi memastikan prinsip 'satu orang satu undi' akan dilaksanakan seperti yang dijanjikan. Jika ya, bilakah persempadanan semula akan diadakan dan adakah Perlembagaan Persekutuan akan dipinda untuk tujuan ini.

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JABATAN PERDANA MENTERI

Tuan Yang Dipertua,

Untuk makluman Ahli Yang Berhormat, Suruhanjaya Pilihan Raya (SPR) dalam menjalankan urusan Kajian Semula Persempadanan Bahagian-Bahagian Pilihan Raya akan sentiasa berpegang kepada empat prinsip persempadanan seperti mana yang diperuntukkan di bawah **Seksyen 2, Bahagian I, Jadual Ketiga Belas, Perlembagaan Persekutuan**. Berhubung dengan isu ketidakseimbangan jumlah pemilih dalam sesebuah bahagian pilihan raya, Perlembagaan Persekutuan memberi panduan kepada isu tersebut dengan mengambil kira faktor geografi dan kemudahan infrastruktur yang terdapat di kawasan luar bandar dan pedalaman seperti mana yang diperuntukkan di bawah **Seksyen 2(c), Bahagian I, Jadual Ketiga Belas, Perlembagaan Persekutuan** seperti berikut:

“(c) bilangan pemilih di dalam setiap bahagian pilihan raya di dalam sesuatu Negeri patutlah lebih kurang sama banyak kecuali bahawa, dengan mengambil kira kesulitan yang lebih besar untuk sampai kepada pemilih di dalam daerah desa dan kesukaran lain yang dihadapi oleh bahagian-bahagian pilihan raya di luar bandar, ukuran pewajaran bagi kawasan patutlah diberikan kepada bahagian-bahagian pilihan raya;”

Sesuai dengan peruntukan undang-undang yang dinyatakan tersebut, pewujudan bahagian-bahagian pilihan raya adalah **tidak bergantung sepenuhnya kepada jumlah pemilih** tetapi **keadaan-keadaan khas atau “special circumstances”** yang wujud di setiap bahagian pilihan raya tersebut juga turut dititik beratkan dan diberi perhatian.

Antara faktor-faktor yang dinilai oleh SPR berkaitan perkara tersebut adalah seperti berikut:

- (i) Keadaan geografi dan topografi kawasan berkenaan;
- (ii) Tahap pembangunan kawasan-kawasan yang terlibat;
- (iii) Keadaan demografi, kepadatan penduduk dan bilangan pemilih; dan
- (iv) Kemudahan asas infrastruktur seperti jalan raya dan sistem komunikasi.

Untuk makluman Ahli Yang Berhormat, Perkara 113 Perlembagaan Persekutuan memperuntukkan bahawa kajian semula persempadanan boleh dimulakan melalui **dua kaedah** seperti berikut:

- (i) **Berlaku pindaan undang-undang ke atas komposisi bilangan keanggotaan Ahli Dewan Rakyat atau Ahli Dewan Undangan Negeri; dan**
- (ii) **Tamat lat tempoh sekurang-kurangnya 8 tahun daripada tarikh siap kajian semula persempadanan sebelumnya. Dalam hal ini, lat tempoh 8 tahun bagi kajian semula persempadanan Negeri Sarawak akan berakhir pada tahun 2023, Negeri Sabah pada tahun 2025 manakala Negeri-Negeri Tanah Melayu pula pada tahun 2026.**

Oleh yang demikian, sekiranya kajian semula persempadanan hendak dilaksanakan sebelum pilihan raya umum akan datang yang **dijangka selewat-lewatnya pada tahun 2023, Kerajaan perlu meminda peruntukan undang-undang di bawah Perkara 113 Perlembagaan Persekutuan** berkaitan dengan lat tempoh minimum suatu kajian semula persempadanan atau **meminda Perkara 46 Perlembagaan Persekutuan berkaitan komposisi Ahli Dewan Rakyat**. Kedua-dua pindaan undang-undang ini **perlu mendapat persetujuan 2/3 daripada jumlah Ahli Dewan Rakyat**. Oleh itu, pihak Kerajaan akan **meneliti opsyen yang terbaik berhubung perkara ini**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' DR. SHAMSUL ANUAR BIN HAJI NASARAH
[LENGGONG]
TARIKH : 06 DISEMBER 2018 (KHAMIS)

SOALAN NO. 14

Y.B. DATO' DR. SHAMSUL ANUAR BIN HAJI NASARAH [LENGGONG] minta **MENTERI KEWANGAN** menyatakan memetik kenyataan Menteri pada 20 September yang lepas, sebanyak 0.2 peratus harga barangan menurun disebabkan SST berbanding harga sewaktu pelaksanaan GST, berdasarkan kenyataan tersebut, nyatakan jenis barangan yang memberi kesan kepada penurunan kos sara hidup rakyat.

JAWAPAN

Tuan Yang di-Pertua,

Berdasarkan kajian yang telah dibuat oleh Kementerian Perdagangan Dalam Negeri Dan Hal Ehwal Pengguna (KPDNHEP) ke atas kesan pelaksanaan SST dari segi harga bagi 417 barangan, secara umumnya, 70% atau 291 barangan mencatatkan penurunan; 27% atau 115 item mengalami kenaikan purata dan 3% atau 11 item tidak mengalami perubahan harga. Analisa tersebut dibuat berdasarkan perbandingan harga purata antara bulan Mei 2018 dengan bulan September 2018 dan merangkumi enam kategori barang iaitu barangan segar (136), barangan kering (25), barangan berbungkus, tin, pek dan botol (159), minuman (25), makanan dan barangan bayi (49) dan barangan kebersihan (23).

Pecahan 291 barangan yang mencatatkan penurunan adalah terdiri dari Kategori Barangan Berbungkus, Tin, Pek dan Botol, 120 barangan (41%); Kategori Barangan Segar, 70 barangan (24%); Kategori Makanan dan Barangan Bayi, 43 barangan (15%); Kategori Barangan Kebersihan, 22 (7.5%); Kategori Minuman, 19 (6.5%); dan Kategori Barangan Kering, 17 (6%). Antara barangan yang mengalami penurunan harga termasuklah barang makanan seperti sos tomato, sos cili, susu tepung, susu pekat, marjerin, sawi, bawang putih import, sardin dalam tin dan minuman koko paket, ubat gigi serta lampin bayi pakai buang.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : PUAN JUNE LEOW HSIAD HUI
[HULU SELANGOR]**

TARIKH : 6 DISEMBER 2018 [KHAMIS]

SOALAN NO. 15

Minta **MENTERI PERUMAHAN DAN KERAJAAN TEMPATAN** menyatakan apakah perkembangan **usaha Kementerian bagi mengkaji dan menyemak semula projek perumahan yang terbengkalai** dan mencari jalan penyelesaian untuk menguruskan kira-kira 350 projek terbengkalai di seluruh negara.

JAWAPAN

Yang di-Pertua,

1. Untuk makluman Yang Berhormat, dari tahun 2009 sehingga 30 September 2018, sebanyak 273 projek perumahan swasta meliputi 70,730 unit rumah dan melibatkan seramai 44,410 orang pembeli rumah telah disahkan terbengkalai di Semenanjung Malaysia selaras dengan Akta Pemajuan Perumahan (Kawalan dan Pelesenan) 1966 [Akta 118]. Manakala pemulihan projek perumahan swasta terbengkalai di negeri Sabah dan Sarawak pula dipantau secara terus oleh Kerajaan Negeri.
2. Kementerian Perumahan dan Kerajaan Tempatan (KPKT) memandang serius permasalahan berkaitan projek perumahan swasta terbengkalai tidak kira sama ada di kawasan luar bandar mahupun di bandar. Justeru, KPKT telah mengambil beberapa inisiatif untuk menangani masalah serta membantu para pembeli projek perumahan swasta terbengkalai seperti berikut:
 - i. Mengenal pasti pemaju-pemaju yang berkeupayaan dan berpengalaman (*white knight*) untuk mengambil alih pemulihan projek perumahan swasta terbengkalai;
 - ii. Melaksanakan pemulihan projek-projek perumahan swasta terbengkalai terutamanya kategori kos rendah dan kos sederhana rendah melalui peruntukan yang disediakan oleh Kerajaan Persekutuan. Peruntukan ini adalah bagi menampung kos tambahan pemulihan projek-projek tersebut. Dari tahun 2009 sehingga 30 September 2018, sebanyak RM219.793 juta telah dibelanjakan bagi menampung kos pemulihan sebanyak 32 buah projek perumahan terbengkalai yang memanfaatkan seramai 5,079 orang pembeli rumah;
 - iii. Menjalinkan kerjasama dengan Jabatan Insolvensi Malaysia/ pelikuidasi swasta bagi membantu memulihkan projek perumahan terbengkalai. Kementerian bertindak sebagai *mediator* bagi

NO SOALAN : 15

membantu pelikuidasi dan kontraktor penyelamat untuk berhubung dengan Pihak Berkuasa Tempatan (PBT), agensi teknikal serta pihak pembiaya (institusi kewangan);

- iv. Mengenakan tindakan pendakwaan dan kompaun ke atas pemaju-pemaju yang tidak mematuhi peruntukan dan peraturan yang terkandung di dalam Akta Pemajuan Perumahan (Kawalan dan Pelesenan) 1966 [Akta 118];
- v. Menyenarai hitam pemaju-pemaju yang menyebabkan projek perumahan terbengkalai, pemaju-pemaju terlibat dengan projek sakit, pemaju-pemaju gagal membayar kompaun, pemaju-pemaju ingkar award Tribunal Tuntutan Pembeli Rumah dan pemaju-pemaju perumahan tanpa lesen. Apabila di senarai hitam, pemaju dan ahli lembaga pengarah syarikat terbabit tidak boleh memohon lesen dan permit iklan dan jualan yang sedia ada. Senarai pemaju-pemaju yang disenarai hitam juga dipaparkan dalam laman sesawang KPKT untuk rujukan pembeli dan *stakeholders* yang lain;
- vi. Membuat pindaan kepada Akta 118 yang telah dikuatkuasakan bersekali dengan Akta Pengurusan Strata 2013 (Akta 757) dan Akta Hakmilik Strata (Pindaan) 2013 (Akta 318) bermula 1 Jun 2015. Pindaan kepada Akta 118 dan peraturan-peraturan adalah seperti berikut:-
 - a) Seksyen 3:
Tafsiran pemaju perumahan merangkumi pihak pelikuidasi dan pegawai penerima.
 - b) Seksyen 6:
Deposit lesen pemajuan perumahan dipinda dari RM200,000.00 kepada 3% daripada anggaran kos pembinaan termasuk kos yuran profesional tetapi tidak termasuk kos tanah.

- c) Seksyen 7B:
Bagi maksud seksyen 7, 8, 8A, 11 dan 12, pemaju perumahan berlesen termasuk mana-mana pemaju perumahan yang lesennya telah tamat.
 - d) Seksyen 8:
Pembeli boleh secara individu memohon untuk menamatkan perjanjian jual beli pada bila-bila masa sekiranya tiada kemajuan pembinaan secara berterusan di tapak pembinaan selama 6 bulan atau lebih selepas perjanjian ditandatangani dengan syarat perlu mendapat perakuan daripada Pengawal Perumahan dan mendapat persetujuan bertulis daripada pihak pembiaya.
 - e) Subseksyen 16AD(1) [Tribunal bagi tuntutan pembeli rumah]:
Kadar penalti dinaikkan kepada tidak kurang daripada RM10,000.00 tetapi hendaklah tidak melebihi RM50,000.00.
 - f) Subseksyen 24(2) [Kuasa untuk membuat peraturan-peraturan]:
Kadar penalti maksimum dinaikkan bagi kesalahan di bawah peraturan daripada RM20,000.00 kepada RM50,000.00.
 - g) Seksyen 18A (Fasal Baru):
Tindakan pendakwaan terhadap pemaju perumahan berlesen yang menyebabkan projek perumahan terbengkalai.
3. Dalam masa yang sama, bagi membantu meringankan beban para pembeli yang terbabit dengan projek perumahan swasta terbengkalai, KPKT turut mengambil inisiatif seperti berikut:
- i. Mengeluarkan surat pengesahan projek perumahan swasta terbengkalai kepada pembiaya akhir (*end-financier*) bagi unit rumah berkaitan;
 - ii. Melalui surat pengesahan ini, para pembeli boleh mendapatkan kemudahan-kemudahan seperti berikut:-

NO SOALAN : 15

- a) Memohon pertimbangan daripada institusi perbankan bagi sebarang permohonan pengurangan kadar faedah dan penstrukturan semula pinjaman perumahan;
- b) Memohon pertimbangan daripada Kumpulan Wang Simpanan Pekerja (KWSP) bagi permohonan pengeluaran kali kedua;
- c) Bagi pembeli yang membuat pinjaman perumahan Kerajaan pula, mereka boleh mendapatkan kemudahan sama ada pertimbangan untuk:-
 - i. Membatalkan pinjaman sedia ada dan diberi peluang untuk memohon pinjaman baru iaitu pinjaman penuh seperti pinjaman pada kali pertama; atau
 - ii. Diberi pertimbangan untuk menangguhkan kenaikan faedah pinjaman pada kadar 4% sepanjang tempoh projek dipulihkan atau selama 5 tahun (mana-mana yang terdahulu).

Walau bagaimanapun, semua perkara di atas adalah tertakluk kepada penilaian institusi pembiaya ke atas peminjam-peminjam berdasarkan merit setiap kes.

- 4. Untuk makluman Yang Berhormat, Kerajaan juga telah melanjutkan pengecualian duti setem ke atas perjanjian pinjaman dan surat cara pindahmilik kepada pembeli asal projek perumahan swasta terbengkalai untuk tempoh 3 tahun lagi sehingga 31 Disember 2020. Inisiatif ini telah diperkenalkan sejak tahun 2013 bagi membantu meringankan bebanan para pembeli yang terbabit dengan projek perumahan swasta terbengkalai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 6 DISEMBER 2018 (KHAMIS)

SOALAN NO. 16

Minta **MENTERI PENDIDIKAN** menyatakan apakah langkah Kerajaan untuk meningkatkan penerbitan buku terjemahan ke Bahasa Malaysia dan adakah Kerajaan menyedari pihak penerbitan buku terjemahan kekurangan dana untuk melakukan terjemahan bahan bacaan akademik dan bacaan berkualiti dan bagi tujuan terjemahan berapakah peruntukan telah dibelanjakan sejak 2013 hingga 2018.

JAWAPAN

Yang Di-pertua,

Semenjak penubuhannya pada 14 September 1993, Institut Terjemahan dan Buku Malaysia (ITBM) telah memainkan peranan penting dalam memperkaya dan memperkasa kepustakaan berbahasa Melayu dan memartabatkan karya sastera kebangsaan di peringkat antarabangsa melalui penerbitan buku terjemahan dalam pelbagai bahasa dan karya asli dalam bahasa Melayu.

Sehingga 30 September 2018, sebanyak 1,756 judul buku terjemahan dalam bahasa Melayu telah diterbitkan yang terdiri daripada pelbagai genre seperti pendidikan (sains, matematik, sukan dan kreatif), rujukan perguruan, pengurusan, pengajian tinggi, umum, sastera Melayu, dunia dan kanak-kanak, agama, falsafah dan ensiklopedia.

Pada masa kini, terdapat sebanyak 372 judul lagi sedang diusahakan terjemahan dan penerbitannya dalam bahasa Melayu. Antara langkah yang dilakukan oleh pihak Kerajaan melalui ITBM bagi meningkatkan penerbitan buku terjemahan dalam bahasa Melayu termasuklah:

1. Meneruskan usaha penerbitan buku terjemahan sedia ada ke bahasa Melayu bergantung kepada dana yang diperoleh daripada pelbagai sumber;
2. Meningkatkan usaha sama dengan pelbagai pihak seperti Penerbit Universiti Awam (UA) dan Universiti Swasta (US) serta badan korporat atau swasta bagi menerbitkan buku terjemahan akademik dan umum dalam bahasa Melayu;
3. Menterjemahkan judul karya besar dunia yang belum diterjemahkan ke dalam bahasa Melayu;
4. Memperkasakan himpunan penterjemah pakar (*pool*) yang dianggotai oleh pakar daripada universiti dan penterjemah bebas yang berpusat di ITBM;
5. Meningkatkan kerjasama dengan pihak universiti bagi melatih pelajar menjadi penterjemah profesional dari segi penawaran

SOALAN NO: 16

kursus pada peringkat sijil, diploma, ijazah sarjana muda, ijazah sarjana dan ijazah doktor falsafah.

Kerajaan memang menyedari bahawa pihak penerbit buku khususnya buku terjemahan menghadapi kekurangan dana untuk melakukan terjemahan bahan bacaan akademik dan bacaan berkualiti. Pada masa ini tiada dana khusus yang diperuntukkan oleh Kerajaan bagi menerbitkan buku terjemahan. Namun begitu, pihak KPM telah membantu melalui penyaluran peruntukan bagi pembekalan buku rujukan dan bahan bacaan tambahan ke sekolah-sekolah di seluruh negara. Pihak KPM telah memperuntukkan sebanyak RM8.8 juta bagi melaksanakan penterjemahan buku bagi tempoh 2013 hingga 2018.

Sekian, terima kasih.

RJM148

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN PRABAKARAN A/L
M. PARAMESWARAN (BATU)**

TARIKH : 6 DISEMBER 2018

SOALAN : 17

**Tuan Prabakaran A/L M Parameswaran [Batu] minta MENTERI
DALAM NEGERI** menyatakan apakah cadangan pihak Kementerian
untuk mengelakkan pertindihan kuasa antara Agensi Anti Dadah
Kebangsaan (AADK) dan Jabatan Siasatan Jenayah Narkotik PDRM
dalam menguatkuasa dan mentadbir Akta Dadah Berbahaya.

JAWAPAN

Tuan Yang Dipertua,

Untuk makluman ahli Yang Berhormat Batu dan Dewan yang
mulia ini, sehingga kini, peruntukan undang-undang menerusi
pewartaan P.U.(B) 287 pada 1 Ogos 2007 tidak membenarkan Agensi
Antidadah Kebangsaan (AADK) menguatkuasakan seksyen 6(a) Akta
Agensi Antidadah Kebangsaan 2004 yang bermaksud, tidak
menguatkuasakan Akta Dadah Berbahaya 1952.

Justeru, tidak timbul isu pertindihan kuasa di antara kedua-dua
Jabatan iaitu AADK dan Polis Diraja Malaysia (PDRM) kerana hanya
PDRM sahaja yang boleh menguatkuasakan dan mentadbir akta
tersebut.

Tuan Yang Dipertua,

Bagi melaksanakan tugas dengan lebih berkesan dan lebih berfokus, Kementerian Dalam Negeri telah membuat pembahagian tugas iaitu:

- i. AADK diberi tanggungjawab untuk melaksanakan tugas pengurangan permintaan dadah yang meliputi program-program Pendidikan Pencegaha, Rawatan dan Pemulihan serta Pengesanan Penagih Dadah. Dalam hal ini, AADK melaksanakan sepenuhnya peruntukan dalam Akta Penagih Dadah (Rawatan dan Pemulihan) 1983.
- ii. PDRM pula bertanggungjawab untuk melaksanakan tugas pengurangan bekalan dadah yang meliputi penguatkuasaan terhadap aktiviti-aktiviti pengedaran dan jenayah berkaitan dadah serta menumpaskan sindiket pengedaran dadah. Dalam hal ini, PDRM melaksanakan sepenuhnya Akta Dadah Berbahaya 1952, Akta Racun 1952, Akta Dadah Berbahaya (Langkah-Langkah Pencegahan Khas) 1985 dan Akta Dadah Berbahaya (Perlucuthakan Harta) 1988.

Walaupun terdapat pembahagian tugas ini, AADK dan PDRM sentiasa bekerjasama dalam menangani masalah dadah melalui Operasi Bersepadu serta mesyuarat-mesyuarat penyelarasan. Dengan adanya usaha berterusan kedua-dua Jabatan ini, masalah dadah di negara kita terus terkawal.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : TUAN ABDUL LATIFF BIN ABDUL
RAHMAN
[KUALA KRAI]**

TARIKH : 6 DISEMBER 2018 (KHAMIS)

SOALAN : 18

minta **MENTERI PEMBANGUNAN LUAR BANDAR** menyatakan status terkini Jambatan Pasir Kelang yang mana pada sidang lepas Menteri menyatakan projek ini ditangguhkan dan apakah faktor-faktor penangguhan itu dan sehingga bilakah penangguhan tersebut.

JAWAPAN

Tuan Yang Di-Pertua,

Untuk makluman Yang Berhormat, bagi Projek Membina Jambatan Antara Kampung Pasir Era ke Kampung Pasir Kelang, Kuala Krai, Kelantan, pihak Kementerian Kewangan (MoF) telah memberikan kelulusan untuk meneruskan pelaksanaan projek ini. Status terkini projek adalah dalam peringkat rekabentuk terpeinci oleh pihak JKR Malaysia. Projek ini dijangka dapat ditender pada bulan April tahun 2019 secara tender terbuka.

**PEMBERITAHUAN PERTANYAAN JAWAB LISAN DEWAN NEGARA
MESYUARAT KE DUA, PENGGAL PERTAMA,
PARLIMEN KE EMPATBELAS**

PERTANYAAN : JAWAB LISAN

DARIPADA : YB TUAN WONG LING BIU (SARIKEI)

TARIKH : 6 DISEMBER 2018

SOALAN : 19

Tuan Wong Ling Bui [Sarikei] minta MENTERI DALAM NEGERI menyatakan apakah langkah-langkah Kerajaan bagi mengawal kebanyakan pekerja tanpa izin, sekaligus memastikan bahawa terdapat pekerja yang mencukupi bagi negara.

JAWAPAN

Tuan Yang Di Pertua,

Untuk makluman Yang Berhormat, Kerajaan tidak mempunyai statistik mutlak berhubung jumlah Pendatang Asing Tanpa Izin (PATI) di negara ini. Walau bagaimanapun, bagi mengekang pertumbuhan jumlah PATI di dalam negara, Jabatan Imigresen Malaysia (JIM) sentiasa menjalankan operasi penguatkuasaan dari semasa ke semasa. Sebanyak 38,513 operasi telah dijalankan dari tahun 2016 sehingga bulan September 2018 dan melalui operasi tersebut, sejumlah 132,042 orang PATI dan 3,742 orang majikan telah ditangkap di bawah pelbagai kesalahan imigresen.

Majikan yang dikesan menggaji PATI boleh diambil tindakan undang-undang di bawah Akta Imigresen 1959/63 di mana majikan akan didakwa di bawah empat kesalahan utama iaitu di bawah Seksyen 55A untuk membawa masuk PATI secara tidak sah ke dalam negara, Seksyen 55B untuk menggaji PATI yang mengenakan hukuman denda tidak kurang RM 10,000 tetapi tidak lebih RM 50,000 atau penjara tidak lebih 12 bulan atau kedua-

duanya bagi setiap orang yang diambil bekerja, Seksyen 55E untuk membenarkan PATI masuk dan tinggal di premis dan Seksyen 56 (1) (d) untuk kesalahan melindungi PATI. Di samping itu, majikan juga boleh didakwa di bawah Akta Anti Pemerdagangan Orang Dan Penyeludupan Migran 2007(Pindaan 2010) (ATIPSOM).

Selain itu, sehingga 30 Ogos 2018, mana-mana PATI boleh menyerah diri secara sukarela ke JIM dan kembali ke negara asal mereka melalui Program Penghantaran Pulang PATI Secara Sukarela (Program 3+1). Melalui program tersebut, mana-mana PATI yang menyerah diri secara sukarela akan dikenakan kompaun sebanyak RM300 dan bayaran Pas Khas sebanyak RM100 serta dikecualikan pendakwaan untuk kesalahan di bawah Akta Imigresen 1959/63 (Akta 155) dan Peraturan-Peraturan Imigresen. Mereka juga akan disenarai hitam daripada memasuki negara untuk tempoh lima tahun dan diambil rekod biometrik untuk rujukan JIM. Statistik terkumpul oleh JIM menunjukkan seramai 874,480 orang PATI telah pulang ke negara asal melalui Program 3+1 sejak tahun 2016 sehingga bulan 30 Ogos 2018.

Sebagai langkah mengesan PATI, mengenalpasti lokaliti dan pekerjaan PATI di dalam Negara, Kerajaan telah melaksanakan pemeriksaan dan risikan berdasarkan aduan yang diterima daripada orang awam dari pelbagai sumber seperti e-mel, surat, telefon, sistem pesanan ringkas dan aduan melalui kaunter imigresen termasuk isu-isu yang berkaitan PATI yang tular di media sosial. Ibu Pejabat dan Pejabat Imigresen Negeri yang menerima sebarang aduan akan menjalankan operasi penguatkuasaan dengan mengambil kira aspek perancangan, faktor risiko dan pematuhan kepada *Standard Operating Procedures* (SOP) seperti yang telah ditetapkan.

Kerajaan juga telah melaksanakan beberapa langkah pencegahan dan kawalan seperti berikut:

- a) Memperketat kawalan dan pemeriksaan di pintu-pintu masuk negara;
- b) Menasihatkan pelawat-pelawat asing ke negara ini agar mempunyai tiket pulang ke negara asal mereka (*return ticket*) di samping menasihatkan mereka agar mempunyai sumber kewangan yang mencukupi untuk menyara diri sepanjang masa berada di negara ini;
- c) Mempertingkatkan pengawasan di sepanjang pesisiran perairan

negara, iaitu kawasan-kawasan yang telah dikenal pasti sebagai tempat pendaratan dan kemasukan PATI dengan kerjasama Pasukan Gerakan Marin Polis DiRaja Malaysia (PDRM), Tentera Laut Diraja Malaysia (TLDM) dan Agensi Penguatkuasaan Maritim Malaysia (APMM);

- d) Memperkasa usaha-usaha risikan, pemantauan dan penguatkuasaan bagi menyekat penyeludupan manusia di sempadan darat negara. Ia dijalankan dengan kerjasama PDRM, Agensi Kawalan Sempadan Malaysia (AKSEM) dan Pasukan Gerak Am (PGA);
- e) Memperketat syarat pengeluaran visa kepada warganegara asing yang memerlukan visa untuk masuk dan berada di Malaysia. Dalam hubungan ini, JIM telah memperkenalkan reka bentuk *Malaysia Visa* dan *Malaysia Pass* pada 2 Oktober 2018 dengan ciri-ciri keselamatan yang terkini dan komprehensif dengan kepelbagaian kaedah perlindungan keselamatan melalui perkembangan dan kemajuan teknologi yang berkesan dan mampan bagi menangani isu penyalahgunaan dan pemalsuan dokumen;
- f) Membuat naziran ke premis-premis yang terdapat warganegara asing, seperti kawasan luar bandar, kawasan bandar dan premis majikan yang menggaji pekerja asing serta institusi pengajian yang mengambil pelajar antarabangsa serta warga asing yang menjadi pasangan warganegara (perkahwinan antara warga asing dengan warga tempatan).

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD.
KADIR [SETIU]**

TARIKH : 6 DISEMBER 2018 (KHAMIS)

SOALAN NO. 20

Minta **MENTERI PERTANIAN DAN INDUSTRI ASAS TANI** menyatakan keluasan projek KETARA 2 dan adakah Kementerian bercadang untuk memasukkan seluruh kawasan penanaman padi di Kawasan Setiu dalam projek KETARA 2 dan apakah perancangan Kementerian dalam membangunkan kawasan penanaman padi terbiar.

JAWAPAN

Tuan Yang Dipertua,

Keluasan projek Kawasan Pembangunan Pertanian Bersepadu (IADA) Terengganu Utara (KETARA) fasa 2 dilaksanakan dengan melibatkan kawasan 5,046 ha. Projek KETARA fasa 2 ini meliputi daerah Setiu (2,507 ha) dan Besut (2,539 ha). Projek KETARA fasa 2 masih lagi dalam perancangan dan dalam pertimbangan kerajaan dengan mengambilkira akan kemampuan kewangan.

Bagi pembangunan tanah padi terbiar atau kurang produktif, kerajaan bercadang untuk mengoptimumkan kawasan tersebut melalui konsep pengurusan secara berkelompok. Bagi tanah yang tidak produktif pula, pesawah digalakkan untuk melaksanakan tanaman lain yang lebih menguntungkan.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN

DARIPADA : YB DATUK HAJI AHMAD JAZLAN BIN YAAKUB [MACHANG]

TARIKH : 6 DISEMBER 2018 (KHAMIS)

SOALAN:

Datuk Haji Ahmad Jazlan bin Yaakub [Machang] minta **PERDANA MENTERI** menyatakan usaha dalam menangkis penularan ideologi Islam liberal yang semakin merebak yang mampu meruntuhkan institusi agama Islam di dalam negara.

JAWAPAN : **(YB DATUK SERI DR MUJAHID YUSOF, MENTERI DI JABATAN PERDANA MENTERI)**

Tuan Yang Di-Pertua,

Kerajaan sentiasa komited untuk memelihara akidah umat Islam supaya sentiasa bertepatan dengan ajaran Islam. Selaras dengan pendirian tersebut, kerajaan melalui kerjasama pelbagai pihak, melibatkan pihak berkuasa agama negeri-negeri, agensi-agensi yang berkenaan dan pihak keselamatan, sentiasa bekerjasama bagi mengawal segala fahaman-fahaman menyeleweng yang boleh menggugat akidah dan keselamatan negara ini.

Antara langkah-langkah yang diambil adalah melalui aspek pendidikan dengan mengadakan program-program penjelasan agar masyarakat jelas dan faham apakah fahaman yang dikatakan menyeleweng itu dan apakah pula fahaman yang benar. Ini dilakukan melalui pendekatan

ceramah, seminar dan juga penyebaran maklumat menerusi media cetak, media elektronik dan sebagainya.

Bahan penerbitan yang jelas mempromosi ideologi pemikiran liberal akan diperaku untuk dikenakan Perintah Larangan (PL) oleh Kementerian Dalam Negeri. Perakuan PL bersandarkan kepada keputusan Muzakarah Majlis Kebangsaan Bagi Hal Ehwal Ugama Islam Malaysia dan Fatwa Negeri yang telah memutuskan bahawa aliran pemikiran liberal bertentangan dengan pegangan Ahli Sunnah wal-Jamaah.

Selain itu, dalam hal ini kita juga turut mengadakan program berbentuk *engagement* seperti sesi-sesi dialog dan perbincangan. Menerusi sesi dialog dan perbincangan diharapkan agar fahaman yang kurang jelas dan tidak tepat dapat dijernihkan mengikut apa yang diajarkan oleh Islam.

Seterusnya, pihak kerajaan turut meningkatkan kerjasama dengan pihak berkuasa agama negeri selaku pihak yang berbidang kuasa dalam isu-isu pentadbiran Islam di negara ini. Kerjasama sepadu antara kerajaan pusat dan kerajaan negeri adalah penting untuk memastikan isu-isu ini tidak menjejaskan ajaran Islam yang sebenar dan seterusnya menggugat keselamatan negara.

Sekian, terima kasih.

PEMBERITAHUAN PERTANYAAN MESYUARAT KEDUA,
PENGGAL PERTAMA, PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : TUAN CHANG LIH KANG
(TANJONG MALIM)

TARIKH : 6 DIS 2018
(KHAMIS)

SOALAN:

Minta **MENTERI PERTAHANAN** menyatakan masalah yang dihadapi oleh Kementerian akibat masalah kewangan SME Ordnance Sdn. Bhd. yang merupakan pembekal senjata dan bahan letupan kepada Kementerian. Apa alternatif sekiranya masalah syarikat tersebut berterusan.

JAWAPAN

Tuan Yang di-Pertua,

Pihak kementerian mempunyai enam kontrak yang sedang berkuatkuasa dengan SME Ordnance Sdn. Bhd. iaitu perolehan bagi membekalkan misil dan peluru untuk Tentera Darat. SME Ordnance Sdn. Bhd. juga merupakan salah satu syarikat di bawah kontrak pusat di Kementerian Kewangan bagi perolehan membekal dan menghantar pelbagai jenis peluru senjata kecil dan alat piroteknik kepada pelbagai agensi Kerajaan di seluruh Malaysia bagi tempoh 2015 hingga 2020.

NO. SOALAN: 23

Sememangnya, tidak dapat dinafikan bahawa masalah yang dihadapi oleh SME Ordnance, sedikit sebanyak telah menjejaskan jadual pembekalan peluru dan misil kepada ATM mengikut tempoh masa yang ditetapkan. Namun, kelewatan ini tidak menjejaskan secara langsung tahap kesiagaan ATM kerana keperluan perolehan peluru-peluru tersebut dilaksanakan dalam tempoh tiga hingga lima tahun sebelumnya. Kelewatan bekalan tersebut hanya memberi impak kepada penjadualan latihan kompetensi anggota ATM sahaja.

Sebagai langkah kontigensi bagi menghadapi masalah pembekalan ini, pihak Kementerian sedang meneliti alternatif lain seperti melaksanakan perolehan melalui tender terbuka atau tender pra-kelayakan kepada syarikat yang berkelayakan dan berwibawa untuk pembekalan ini dengan kelulusan Kementerian Kewangan.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN

**DARIPADA : YB TUAN HAJI AWANG BIN HASHIM
[PENDANG]**

TARIKH : 6 DISEMBER 2018 (RABU)

SOALAN :

Tuan Haji Awang bin Hashim [Pendang] minta **PERDANA MENTERI** menyatakan secara holistik dan terperinci apakah kesalahan di dalam metodologi dakwah Dr. Zakir Naik, sehingga metodologi dakwah beliau dikatakan tidak sesuai di negara ini.

JAWAPAN : **(YB DATUK SERI DR MUJAHID YUSOF,
MENTERI DI JABATAN PERDANA MENTERI)**

Tuan yang di-Pertua,

Selaras dengan Perkara 3 (1) Perlembagaan Persekutuan, Islam adalah agama bagi Persekutuan dan hal ehwal agama Islam adalah di bawah bidang kuasa negeri melalui Jadual Kesembilan, Senarai II, Senarai Negeri, Perlembagaan Persekutuan, maka semua penceramah dan juga pihak berkaitan dari luar negara perlu mendapat kebenaran daripada pihak berkuasa agama negeri dan mendapat tauliah daripada Pejabat Mufti Negeri serta pihak keselamatan sebelum sesuatu ceramah dilaksanakan. Para pendakwah yang hendak berdakwah di negara ini perlu melalui

tapisan keselamatan yang dilakukan kepada penceramah serta mereka yang terlibat, agar bersesuaian dengan ajaran Ahli Sunnah wal-Jamaah.

Malaysia adalah Negara yang didiami oleh pelbagai bangsa dan agama. Sehubungan itu, perkara berkaitan sensitiviti agama perlu dikendalikan dengan cukup berhati-hati supaya tidak menimbulkan persepsi dan reaksi yang boleh mengganggu gugat kestabilan dan keharmonian antara agama. Isu antara agama di Malaysia sangat sensitif dan sekiranya tidak ditangani dengan cara yang berhikmah boleh menggugat keharmonian dan perpaduan kaum.

Metodologi dakwah inilah yang perlu Dr. Zakir Naik ambil kira dalam menyampaikan dakwah agar dapat disesuaikan dengan perpaduan dan keharmonian kaum di Malaysia. Kaedah dakwah di negara ini lebih sesuai menggunakan kaedah dialog dan forum demi meraikan kepelbagaian kaum dan agama di negara ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 6 DISEMBER 2018 (KHAMIS)

SOALAN NO.25

Minta **MENTERI HAL EHWAL EKONOMI** menyatakan apakah langkah-langkah yang diambil Kerajaan untuk;-

- (a) Merapatkan jurang pendapatan isi rumah; dan
- (b) Mencapai pendapatan per kapita GNI USD15,000 menjelang 2020 memandangkan kira-kira 40% daripada isi rumah kumpulan B40 berpendapatan purata di bawah RM3,860.

JAWAPAN

Tuan Yang di-Pertua,

Untuk makluman Ahli Yang Berhormat,

Pendapatan Negara Kasar (PNK) perkapita didefinisikan sebagai jumlah barang dan perkhidmatan yang dihasilkan dalam negara, ditambah pendapatan diterima daripada negara lain, tolak pembayaran kepada negara lain dan dibahagikan dengan jumlah penduduk. Untuk mencapai pendapatan per kapita GNI USD15,000 menjelang 2020, ianya boleh diukur dengan pertumbuhan ekonomi negara menerusi Keluaran Dalam Negara Kasar (KDNK) per kapita untuk menunjukkan status kekayaan negara. Kedudukan ini akan meletakkan setiap negara di dalam kategori masing-masing, sama ada sebagai negara maju, negara membangun atau sebagai negara mundur dan ianya adalah di peringkat negara.

Manakala pendapatan isi rumah pula adalah jumlah pendapatan yang diterima oleh isi rumah dan purata saiz isi rumah seluruh negara adalah 4 orang. Berdasarkan Laporan Penyiasatan Pendapatan Isi Rumah dan Kemudahan Asas (PPIR & KA) 2016, had pendapatan bulanan isi rumah B40 adalah RM4,360 ke bawah dan masih terdapat jurang pendapatan yang tinggi berbanding purata pendapatan bulan isi rumah B40 sebanyak RM2,848.

Sehubungan itu, Kerajaan akan terus berusaha bagi mengurangkan ketidakseimbangan dan jurang pendapatan sebagaimana ditekankan dalam Kajian Separuh Penggal Rancangan Malaysia Kesebelas (KSP RMKe-11). Usaha ini akan dilakukan melalui langkah-langkah bagi meningkatkan pendapatan dan kuasa beli isi rumah berpendapatan 40 peratus terendah (B40), memperkukuh potensi ekonomi Bumiputera dan suku kaum di Sabah dan Sarawak serta Orang Asli, dan merapatkan jurang pembangunan antara wilayah dan antara bandar-luar bandar.

KSP RMKe-11 turut memberi tumpuan kepada isu kenaikan kos sara hidup yang perlu ditangani secara efektif bagi memastikan kesejahteraan rakyat, khususnya isi rumah B40, terus terpelihara. Dalam hubungan ini, selain langkah utama bagi meningkatkan pendapatan dan kuasa beli isi rumah B40, Kerajaan juga akan mengambil beberapa langkah seperti melaksanakan harga kawalan, mengurangkan monopoli dalam pasaran, mempertingkatkan penguatkuasaan serta memperbanyak tempat bagi pengguna membeli barangan dan perkhidmatan pada harga patut.

Kerajaan juga akan terus memberikan penekanan terhadap pembangunan inklusif yang berteraskan kepada beberapa prinsip utama seperti ketelusan, berdasarkan keperluan dan merit, mesra pasaran, mampan dan menyokong pertumbuhan. Pendekatan ini akan memastikan tiada kumpulan masyarakat akan tercicir tanpa mengira gender, etnik, status sosioekonomi dan lokasi geografi daripada mendapat peluang dan manfaat pertumbuhan ekonomi seterusnya akan dinikmati oleh semua rakyat atau *'shared prosperity'*.

Sekian, terima kasih.
6 Disember 2018

Kementerian Hal Ehwal Ekonomi

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DATO' SERI MAHDZIR BIN KHALID

TARIKH : 06 DISEMBER 2018

SOALAN :

Dato' Seri Mahdzir bin Khalid [Padang Terap] minta **MENTERI TENAGA MANUSIA** menyatakan adakah peningkatan gaji minimum sebanyak RM50 yang akan berkuat kuasa pada 1 Januari 2009 itu selari dengan situasi kos sara hidup pada masa kini disebabkan oleh kenaikan harga barang akibat pelaksanaan Cukai Jualan dan Perkhidmatan (SST).

PR-1412-L02078

JAWAPAN

Tuan Yang Di Pertua,

1. Kerajaan memutuskan buat pertama kalinya untuk menyeragamkan kadar gaji minimum bagi seluruh negara pada kadar RM1,050 sebulan. Ini adalah sepertimana yang telah dijanjikan dalam Manifesto Pakatan Harapan semasa Pilihan Raya Umum ke-14. Kerajaan sedar ini memberi peningkatan sebanyak RM50 sahaja bagi Semenanjung Malaysia tetapi bagi negeri Sabah, Sarawak dan Wilayah persekutuan Labuan ianya memberi peningkatan yang tinggi iaitu sebanyak 14% atau RM130 sebulan.

2. Memandangkan Kerajaan baharu bertekad untuk menyeragamkan gaji minimum untuk seluruh negara, maka peningkatan yang terlalu mendadak bagi majikan bakal membawa implikasi yang besar. Ini memandangkan gaji minimum adalah gaji pokok, maka peningkatan gaji pokok yang tinggi juga bakal meningkatkan kos operasi syarikat kerana caruman kepada KWSP, PERKESO dan bayaran kerja lebih masa, bayaran kerja pada hari rehat, bayaran kerja pada hari cuti am dan sebagainya adalah berpaksikan kepada gaji pokok.

3. Maka buat masa sekarang pendekatan *balanced approach* diambil kira. Saya yakin dalam tempoh 5 tahun pentadbiran Kerajaan

Pakatan Harapan, kita akan berjaya meningkatkan gaji minimum kepada suatu kadar yang munasabah.

4. Di samping itu, kita sedia maklum bahawa 90% majikan-majikan di negara ini adalah terdiri daripada majikan Perusahaan Kecil dan Sederhana (PKS). Dikhuatiri sebarang kenaikan gaji minimum yang mendadak boleh menjejaskan daya saing industri PKS di negara ini.

5. Sepertimana kita sedia maklum, dasar gaji minimum hanyalah salah satu dasar intervensi Kerajaan. Terdapat banyak dasar-dasar lain yang telah dan akan disediakan oleh Kerajaan bagi membantu rakyat terutamanya kumpulan B40 di negara ini.

6. Kesimpulannya, kadar gaji minimum yang ditetapkan oleh Kerajaan iaitu RM1,050 mulai 1 Januari 2019 hanyalah sebagai *floor wages* sahaja yang mana pekerja di sektor swasta tidak boleh dibayar gaji pokok kurang daripada kadar tersebut. Dengan itu, majikan dan pekerja atau kesatuan sekerja bebas untuk berunding bagi penetapan gaji pokok dan faedah-faedah lain yang lebih tinggi.

PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGGAL KELIMA

PERTANYAAN : LISAN
DARIPADA : PUAN WONG SHU QI
KAWASAN : KLUANG
TARIKH : 6 DISEMBER 2018

SOALAN

Puan Wong Shu Qi [Kluang] minta MENTERI PERDAGANGAN ANTARABANGSA DAN INDUSTRI menyatakan rancangan untuk mengurangkan kesan negatif kepada industri domestik berikutan perang dagang antara Amerika Syarikat (AS) dan China (RRC) yang semakin serius.

JAWAPAN

Tuan Yang Dipertua,

1. Tidak dinafikan bahawa perang perdagangan yang sedang berlaku di antara AS dan RRC telah mengundang kerisauan terhadap pengeluaran-pengeluar domestik dan para pelabur yang menjalankan aktiviti mereka di Malaysia. Kerajaan Malaysia tidak mengambil ringan atas kebimbangan tersebut dan telah mengambil langkah awal dengan menubuhkan Pasukan Petugas Khas Konflik Perdagangan Amerika Syarikat-China atau dengan izin, *US-China Taskforce on Trade Conflict* pada Julai 2018.
2. Pasukan petugas khas ini ditubuhkan dengan tujuan untuk memantau dan menangani perkembangan konflik perdagangan Amerika Syarikat-China dan juga tindak balas dari negara-negara lain. Selain daripada itu, pasukan ini juga bertindak sebagai platform bagi pihak berkepentingan untuk mengemukakan pandangan, komen dan maklumbalas mengenai konflik ini.
3. Pasukan Petugas Konflik Perdagangan Amerika Syarikat-China kini sedang dalam proses menjalankan soal selidik bersama-sama industri bagi mendapatkan maklum balas dalam merumuskan strategi untuk menangani konflik perdagangan Malaysia.
4. Selain itu, pada Perhimpunan Agong PBB yang ke-73 yang diadakan pada 28 September 2018, YAB Perdana Menteri juga telah menyatakan pendirian Malaysia yang tidak menyokong perang dagang ini kerana ia akan menjejaskan banyak pihak. Pada masa yang sama, YAB Perdana Menteri telah berjumpa dengan komuniti perniagaan Amerika Syarikat untuk berkongsi hala tuju kerajaan baharu bagi dasar perdagangan dan pelaburan negara. Perjumpaan ini berjaya memberi keyakinan bahawa kerajaan baharu adalah pro-perdagangan dan pro-pelaburan.

Tuan Yang Dipertua,

5. Bagi meningkatkan lagi eksport negara, Agensi Promosi Perdagangan Kebangsaan Malaysia (MATRADE) telah mengenalpasti beberapa kategori produk berpotensi untuk pasaran Amerika Syarikat dan China. Antara kategori produk tersebut adalah E&E, kelengkapan mesin, produk optikal dan saintifik, produk petroleum, dan juga kimia. Bagi negara China misalnya, pengurangan import kacang soya dari Amerika Syarikat akan membuka jalan bagi peningkatan eksport minyak sawit Malaysia ke pasaran China.
6. Kita sentiasa melaksanakan interaksi berterusan di antara MITI dan komuniti perniagaan seperti *American-Malaysian Chamber of Commerce*, *US-ASEAN Business Council* dan *US Chamber and Commerce* **[dengan izin]** menggambarkan komitmen dan keyakinan mereka, terutamanya dalam mengembangkan pelaburan sedia ada di Malaysia. Malah, delegasi *US-ASEAN Business Council* telah melawat Malaysia pada 16-18 Oktober 2018 untuk meneroka peluang pelaburan serta bertemu dengan beberapa kementerian dan agensi kerajaan, termasuk dengan MITI. MITI yakin pertemuan dan perbincangan terbuka seperti ini adalah penting untuk menambah baik persekitaran perniagaan dan meninjau peluang kerjasama dalam sektor-sektor berkepentingan.

Sekian, terima kasih.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGAL PERTAMA
PARLIMEN KEEMPAT BELAS (2018)

PERTANYAAN : LISAN

DARIPADA : YB DATO' HAJI ABDUL RAHMAN BIN MOHAMAD [LIPIS]

TARIKH : 6 DISEMBER 2018 (KHAMIS)

SOALAN:

Dato' Haji Abdul Rahman bin Mohamad [Lipis] minta **PERDANA MENTERI** menyatakan sebarang bentuk mekanisme yang difikirkan oleh Kerajaan untuk mencegah perilaku yang berunsur Lesbian, Gay, Bisexual dan Transgender (LGBT) dan pada masa yang sama dapat memastikan agar golongan tersebut tidak didiskriminasi atau dipinggirkan.

JAWAPAN : (YB DATUK SERI DR MUJAHID YUSOF,
MENTERI DI JABATAN PERDANA MENTERI)

Tuan Yang Di-Pertua,

Berhubung mekanisme yang diambil oleh Kerajaan untuk mencegah perilaku LGBT dan pada masa yang sama tidak meminggirkan dan mendiskriminasikan mereka adalah melalui 4 elemen utama :

a) Undang-Undang

Malaysia misalnya memperuntukkan undang-undang sivil berkenaan persetubuhan yang bertentangan dengan aturan tabii di bawah Seksyen 377A Kanun Keseksaan, serta Enakmen Jenayah Syariah Negeri-Negeri berkenaan perlakuan liwat, musahaqah dan orang lelaki berlagak seperti perempuan sebagaimana yang termaktub di dalam Seksyen 25,

Seksyen 26 dan Seksyen 28 di dalam Akta Kesalahan Jenayah Syariah (Wilayah-Wilayah Persekutuan) 1997 untuk membendung gejala LGBT ini. Ia bermaksud, hak komuniti LGBT untuk mengamalkan gaya hidup mereka masih tertakluk dengan undang-undang yang tidak membenarkan di Malaysia. Namun begitu, pada waktu yang sama, hak asasi manusia warga negaranya termasuk komuniti LGBT sentiasa dipelihara berdasarkan acuan adat dan budaya di Malaysia.

b) Advokasi dan Pencegahan

Program Pendidikan dan Advokasi Berkaitan Isu LGBT berbentuk seminar telah mensasarkan masyarakat awam termasuk pelajar-pelajar sekolah, universiti awam dan swasta (UA/US), kaunselor sekolah/UA/US, ibu bapa, sukarelawan sosial Islam, staf kesihatan dan wakil NGO sosial Islam. Seminar ini akan membincangkan isu LGBT dari aspek psikososial, psikologikal, psikospiritual dan kesihatan agar peserta mendapat maklumat dan kemahiran yang tepat bagi menghindari perlakuan LGBT serta membantu golongan yang terlibat untuk meninggalkan perlakuan LGBT.

c) Bimbingan

Inisiatif membimbing golongan ini dengan melaksanakan aktiviti temuseru (*outreach*) ke kawasan yang dikenali pasti serta mengajak mereka yang beragama Islam menyertai program rawatan dan pemulihan (*'Ilaj wa Syifa'*) secara sukarela iaitu Program Mukhayyam yang telah dilaksanakan semenjak tahun 2011 dengan kerjasama Jabatan Agama Islam Negeri-negeri (JAIN) dan Pertubuhan Bukan Kerajaan (NGO). Selain itu, aktiviti susulan seperti usrah dan kelas pengajian turut dilaksanakan, sebagai suatu bentuk sokongan dan bimbingan yang berterusan (*peer support*) agar kesedaran melakukan perubahan adalah berpanjangan.

d) Alternatif pekerjaan

Pada waktu yang sama, Kerajaan menyedari bahawa sikap yang ditunjukkan oleh masyarakat terhadap golongan LGBT, membuatkan mereka lebih jauh tersisih dan akhirnya menjerumuskan mereka ke kancah pekerjaan seks, terutamanya golongan transgender. Kajian terkini menunjukkan bahawa golongan transgender dianggarkan berjumlah sekitar 20,000 orang dan hampir 80% daripada mereka

terlibat sebagai pekerja seks. Justeru, Kerajaan sedang berbincang dengan beberapa agensi pekerjaan yang mahu memberi peluang pekerjaan yang bersesuaian kepada golongan transgender khususnya, mengambil kira sensitiviti dan adat budaya setempat di negara kita. Bantuan zakat al-Riqab sebagaimana yang dipelopori oleh Majlis Agama Islam Selangor adalah contoh yang terbaik untuk diikuti. Bantuan tersebut diberikan melalui perantaraan mana-mana institusi, pusat, NGO Islam dan individu perseorangan yang dibenarkan oleh undang-undang dan hukum syarak yang berfungsi melaksanakan tugas membebaskan, mengurus, melindungi, merawat dan memulih asnaf al-Riqab yang di antaranya golongan LGBT, sebagai golongan yang terbelenggu dengan gaya hidup songsang dan perlu dibimbing supaya dapat menjalani kehidupan sempurna secara Islam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI TIONG KING SING
[BINTULU]**

TARIKH : 6 DISEMBER 2018 (KHAMIS)

SOALAN NO. 29

Minta **MENTERI PERUMAHAN DAN KERAJAAN TEMPATAN** menyatakan :-

- a) adakah pihak Kementerian **mempunyai rancangan untuk membina balai bomba mini di kawasan pedalaman** memandangkan keadaan geografi dan jaringan jalan penghubung yang mengambil masa yang lama untuk sampai ke lokasi bencana terutamanya di kawasan luar bandar seperti Bintulu yang jauh dari pusat Bandar Bintulu ; dan
- b) apakah **langkah-langkah Kerajaan dalam meningkatkan kualiti dan mutu perkhidmatan pasukan penyelamat** seperti menaik taraf peralatan dan sistem kebakaran terutama di kawasan Bintulu seperti enjin bomba, perahu, pili bomba dan kemudahan-kemudahan lain dan sejauh manakah perlaksanaannya

JAWAPAN

Yang di-Pertua,

- a) Untuk makluman Yang Berhormat, Kementerian Perumahan dan Kerajaan Tempatan (KPKT) sentiasa membuat perancangan bagi mewujudkan atau membina balai-balai bomba baharu di seluruh negara termasuk di kawasan Bintulu. Sebagai rekod, KPKT telah diluluskan projek pembinaan balai Bomba baharu di kawasan **Belaga** yang telah selesai proses perolehan dan kini dalam tindakan Kementerian untuk mengemukakan **Surat Setuju Terima (SST)** kepada pembida yang berjaya.

Dalam *Rolling Plan* 4 Tahun 2019, Kementerian ini juga telah diluluskan projek pembelian bangunan di kawasan **Sungai Plan, Kidurong** yang akan dinaiktaraf menjadi balai bomba baharu. Kedua-dua **projek balai baharu di Belaga dan Sungai Plan** akan **memendekkan response time** ke kawasan terlibat yang sebelum ini hanya mendapat perkhidmatan kebombaanan dari Balai Bomba dan Penyelamat Bintulu masing-masing dengan jarak **200 kilometer** (Belaga) dan **21 kilometer** (Sungai Plan).

Pada masa ini, kawasan Belaga juga mendapat bantuan kebombaanan dari **Pasukan Bomba Sukarela Pekan Belaga** yang dianggotai seramai **30 ahli** dan dilengkapi dengan pam angkut dan peralatan pemadaman kebakaran seperti hos, nozel dan Peralatan Perlindungan Diri (*Personal Protective Equipment*).

Manakala kawasan Sungai Plan turut mendapat bantuan kebombaanan dari **Pasukan Bomba Sukarela Kampung Kamunting** dengan jarak sejauh **19 kilometer**. Pasukan ini dianggotai seramai **20 ahli** dan dilengkapi dengan pam angkut dan

peralatan pemadaman seperti hos, nozel dan Peralatan Perlindungan Diri (*Personal Protective Equipment*).

- b) Berhubung langkah kerajaan dalam meningkatkan kualiti perkhidmatan, KPKT sedang membuat semakan keperluan perolehan bagi **menaik taraf** balai Bomba sedia ada dan Balai Bomba Sukarela termasuk **perolehan peralatan** seperti jentera, pam, hos, nozel serta Peralatan Perlindungan Diri (*Personal Protective Equipment*) seperti *helmet*, baju dan kasut api. Pada masa ini terdapat **2,684 pili bomba** di **Bintulu** di mana **85 pili bomba** sedang dalam **proses pembaikan**.

Selain daripada perolehan peralatan, mutu perkhidmatan kebombaan di Sarawak juga **dipertingkatkan melalui kerjasama strategik** Jabatan Bomba dan Penyelamat Malaysia (JBPM) dengan pelbagai agensi seperti **Polis Diraja Malaysia (PDRM)**, **Angkatan Pertahanan Awam (APM)**, **Jabatan Kebajikan Masyarakat (JKM)** dan lain-lain dalam menghadapi bencana seperti banjir.

Pada **5 Oktober 2018**, satu simulasi bencana banjir telah diadakan di **Lubuk Tapang, Sebauh, Bintulu** anjuran JKM bagi meningkatkan kesiapsiagaan agensi-agensi Persekutuan dan Negeri termasuk penduduk setempat yang turut melibatkan tatacara pengendalian bantuan makanan. Program yang seumpamanya juga telah diadakan di **Uma Sambop, Belaga** pada **26 dan 27 Oktober 2018**. Ketika ini sebanyak **4 buah bot** ditempatkan di **Balai Bomba dan Penyelamat Bintulu** dengan kekuatan **11 orang ahli Pasukan Penyelamatan di Air (PPDA)** untuk melaksanakan operasi penyelamatan di air.

Bagi meningkatkan tahap keselamatan kebakaran di kawasan pedalaman terutamanya di kawasan Bintulu, JBPM juga

berkolaborasi dengan Pertubuhan Bukan Kerajaan (NGO) di mana kempen kesedaran dan pengagihan alat pemadam api dibuat di rumah-rumah panjang.

Pada **9 Disember 2018**, JBPM akan mengadakan ***Outreach Program*** bersama ***Malaysian Fire Protection Association (MFPA)*** di **kawasan Bintulu** melibatkan perkampungan rumah panjang **Uma Lahanan, Sungai Asap** di mana **150 unit Alat Pemadam Api** akan diagihkan kepada **150 ahli Pasukan Bomba Komuniti** yang mampu memberikan manfaat kepada hampir **500 orang penduduk setempat**. Program-program seperti ini kini sedang dirancang untuk diperluaskan ke kawasan pedalaman kerana adanya keupayaan alat pemadam api yang lengkap dan anggota sukarela yang terlatih akan membantu dalam tindakan memadam kebakaran pada peringkat awal.

Sehubungan itu, KPKT menggesa lebih banyak NGO menyokong membantu merealisasikan hasrat kerajaan dalam meningkatkan tahap kesedaran keselamatan di kalangan rakyat negara ini melalui aktiviti **tanggungjawab sosial korporat (CSR)** dengan turun padang bersama agensi-agensi kerajaan yang berkaitan demi kesejahteraan rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HAJAH AZIZAH BT DATUK SERI
PANGLIMA HAJI MOHD DUN
[BEAUFORT]**

TARIKH : 6 DISEMBER 2018 (KHAMIS)

SOALAN NO. 30

Minta **MENTERI HAL EHWAL EKONOMI** menyatakan apakah perancangan kementerian bagi menghapuskan jurang perbezaan kedudukan ekonomi antara kaum di Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan akan menyediakan peluang yang saksama kepada semua rakyat untuk menerima faedah dan mengambil bahagian dalam pembangunan negara berasaskan kepada prinsip keperluan. Bagi mengurangkan jurang perbezaan kedudukan ekonomi antara kaum di negara ini, fokus akan diberikan kepada pendekatan pembangunan yang inklusif, melalui tumpuan khusus bagi meningkatkan pendapatan isi rumah berpendapatan 40 peratus terendah (B40) di seluruh negara.

Antara strategi utama bagi meningkatkan pendapatan isi rumah B40 adalah seperti berikut:

Pertama: **Pembangunan Modal Insan dan Gunatenaga** dengan mengurangkan kadar keciciran pelajar; memperkukuh akses kepada pendidikan awal kanak-kanak, meningkatkan akses kepada pendidikan dan latihan kemahiran tinggi; meningkatkan penggunaan teknologi maklumat dan komunikasi; dan meningkatkan *employability* graduan;

Kedua: **Pembangunan Keusahawanan** dengan menyediakan sokongan keusahawanan secara bersepadu termasuk pembiayaan dan bimbingan; pembangunan kapasiti dan kapabiliti, membangunkan perusahaan berasaskan komuniti; menggalakkan keusahawanan secara atas talian (*online*) dan keusahawanan sosial; dan

Ketiga: **Peningkatan Produktiviti** dengan menggalakkan penggunaan teknologi moden dan amalan terbaik dalam aktiviti pertanian, perikanan dan penternakan serta bagi pekebun kecil getah dan kelapa sawit.

Selain daripada langkah-langkah di atas, Kerajaan akan memperluas program pelaburan seperti Amanah Saham Wawasan (ASW), Amanah Saham Gemilang (ASG) dan Amanah Hartanah Bumiputera (AHB). Selain itu, Kerajaan juga akan menambah baik program dan skim bantuan yang ditujukan khas kepada isi rumah B40 yang masih dibelenggu kemiskinan tanpa mengira kaum supaya mereka dapat hidup sejahtera dan tidak tertinggal daripada arus pembangunan.

Kerajaan yakin dengan pelaksanaan strategi di atas, perbezaan kedudukan ekonomi antara kaum akan dapat diatasi sekaligus pertumbuhan ekonomi negara dapat dinikmati oleh semua rakyat tanpa mengira latar belakang sosioekonomi.

Sekian, terima kasih.
6 Disember 2018

Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK DR. JEFFREY GAPARI
KITINGAN [KENINGAU]**

TARIKH : 6 DISEMBER 2018

SOALAN :

Minta **MENTERI PELANCONGAN, SENI DAN BUDAYA** menyatakan :-

- a) adakah Kementerian bercadang menjadikan Batu Sumpah yang terletak di Keningau, Sabah, sebagai satu tugu nasional dan produk pelancongan yang menarik memandangkan ianya satu-satunya "Dokumen Berperlembagaan" dan tugu bersejarah tunggal yang terpahat di batu mengenai pembentukan Persekutuan Malaysia pada 1963; dan
- b) bilakah Kementerian akan memulihkan perkataan-perkataan asal "Kerajaan Malaysia jamin" pada batu sumpah yang telah dihilangkan oleh pihak-pihak yang tidak bertanggungjawab atau memasang semula plak batu sumpah yang asal yang telah dijumpai selepas lebih daripada 30 tahun dimana ianya diganti dengan plak yang baru tanpa perkataan-perkataan asal "Kerajaan Malaysia jamin".

JAWAPAN :

Tuan Yang di-Pertua,

Kementerian Pelancongan, Seni dan Budaya sentiasa bekerjasama dengan Kementerian Pelancongan, Kebudayaan dan Alam Sekitar Sabah (KePKAS) serta agensi-agensi di bawahnya khususnya Jabatan Muzium Sabah untuk memastikan Batu Sumpah diberi pengiktirafan sewajarnya. Batu Sumpah akan diwartakan di peringkat negeri Sabah sebagai warisan negeri di bawah Enakmen Warisan Negeri Sabah 2017. Sehubungan itu, Kementerian ini melalui Jabatan Warisan Negara mencadangkan agar Batu Sumpah juga diwartakan di peringkat nasional iaitu di bawah Akta Warisan Kebangsaan 2005 [Akta 645] atas kepentingannya kepada sejarah pembentukan Persekutuan Malaysia. Kementerian ini juga yakin dengan pewartaan Batu Sumpah akan memberi nilai tambah terhadap Batu Sumpah. Pemindahan Batu Sumpah dari Pejabat Daerah Keningau ke lokasi bersebelahan dengan Muzium Warisan Keningau yang telah diadakan pada 9 September 2018 akan menjadi lebih mudah diakses oleh masyarakat tempatan dan boleh menjadi produk pelancongan warisan yang boleh menarik pelancong-pelancong ke Negeri Sabah. Bagi tujuan pemindahan Batu Sumpah ini, Kementerian telah menyalurkan peruntukan kepada KePKAS sebanyak RM500,000.00 termasuk menyediakan kemudahan persekitarannya.

Kementerian ini juga dimaklumkan bahawa pihak Kerajaan Negeri Sabah telah meluluskan plak baharu yang akan mengekalkan penggunaan perkataan asal Batu Sumpah iaitu “Kerajaan Malaysia Jamin” yang mana ia sedang dalam proses penyediaan oleh Jabatan Muzium Sabah.

Sekian, terima kasih.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN

DARIPADA : YB PUAN HAJAH SITI ZAILAH BINTI MOHD YUSOFF [RANTAU PANJANG]

TARIKH : 6 DISEMBER 2018 (KHAMIS)

SOALAN :

Puan Hajah Siti Zailah binti Mohd Yusoff [Rantau Panjang] minta **PERDANA MENTERI** menyatakan penjelasan mengapa Kerajaan Pusat membantah dan mempertikaikan pelaksanaan hukuman sebatan syariah yang dilaksanakan terhadap pesalah Lesbian di Terengganu sedangkan ianya berlandaskan Enakmen Kesalahan Jenayah Syariah (Takzir) (Terengganu) 2001 dan Akta Mahkamah Syariah (Bidang Kuasa Jenayah).

JAWAPAN : **(YB DATUK SERI DR MUJAHID YUSOF, MENTERI DI JABATAN PERDANA MENTERI)**

Tuan Yang di-Pertua,

Kerajaan menghormati bidang kuasa yang diperuntukkan oleh undang-undang kepada Mahkamah Tinggi Syariah untuk menjatuhkan hukuman sebat dan membuat perintah berkaitan pelaksanaan hukuman sebat tersebut. Kerajaan juga tidak berhasrat untuk campur tangan dalam perkara-perkara yang berkaitan dengan hal ehwal Mahkamah Syariah kerana ia terletak di bawah bidang kuasa perundangan dan kehakiman negeri-negeri.

Sungguh pun demikian, Kerajaan Persekutuan mengambil pendekatan bahawa bidang kuasa yang diperuntukkan oleh undang-undang kepada mahkamah sewajarnya digunakan seiring dengan budi bicara yang ada pada mahkamah. Dalam erti kata lain, walaupun mahkamah mempunyai bidang kuasa untuk menjatuhkan apa-apa hukuman yang diperuntukkan oleh undang-undang, namun mahkamah juga perlu mengambil kira prinsip-prinsip kehakiman yang utuh (*well established judicial principles*) dalam menentukan jenis dan kadar hukuman yang dijatuhkan dalam setiap kes.

Ini bererti, mahkamah perlu mengambil kira fakta-fakta yang relevan dalam sesuatu kes. Selain itu, mahkamah juga perlu mengambil kira faktor-faktor yang berkaitan yang boleh meringankan hukuman (*mitigating factors*) dan yang boleh memberatkan hukuman (*aggravating factors*) agar hukuman yang dijatuhkan itu benar-benar adil, wajar dan setimpal. Jenis dan kadar hukuman yang dijatuhkan itu juga perlu bersandarkan kepada fakta-fakta dan merit-merit dalam sesuatu kes. Setiap kes mempunyai fakta dan merit tersendiri serta memerlukan penilaian yang berbeza daripada mahkamah sebelum sesuatu keputusan dibuat dan hukuman dijatuhkan.

Begitu juga berkenaan perintah pelaksanaan hukuman sebat yang mana Mahkamah Syariah mempunyai bidang kuasa untuk memerintahkan hukuman sebat dilaksanakan di mana-mana tempat atau di suatu tempat yang ditetapkan oleh Kerajaan Negeri. Walau bagaimanapun, dalam melaksanakan bidang kuasa tersebut mahkamah masih boleh menggunakan pertimbangan budi bicara dengan mengambilkira kepentingan awam dan keadaan semasa agar pelaksanaan hukuman itu dapat menggambarkan bahawa Islam adalah agama yang adil, syumul dan bertoleransi yang boleh memberi rahmat kepada semua pihak termasuk orang awam, pihak berkuasa agama, pesalah dan keluarga pesalah itu sendiri.

Selain itu, dalam keadaan-keadaan tertentu, sudah tiba masanya untuk Mahkamah Syariah memberi penekanan yang lebih kepada hukuman-hukuman yang bersifat pemulihan (*rehabilitative*) berbanding hukuman-hukuman yang berbentuk pembalasan (*retributive*). Hukuman-hukuman yang bersifat pemulihan adalah bertujuan untuk mendidik dan memulih pesalah-pesalah kali pertama supaya kembali ke landasan yang betul tanpa menjalani hukuman yang berbentuk pembalasan. Walau bagaimanapun, hukuman yang berbentuk pembalasan masih boleh dipertimbangkan oleh mahkamah dalam kes-kes tertentu contohnya kes-kes yang melibatkan pesalah-pesalah yang berulang (*habitual offenders*). Pendirian Kerajaan ini tidak lain dan tidak bukan hanyalah untuk memastikan bahawa agama Islam dicerminkan sebagai agama yang bersifat pemaaf, mendidik, memberi peluang kedua dan rahmah dan bukannya agama yang bersifat menghukum semata-mata sesuai dengan risalah Nabi Muhammad SAW sebagai rahmat bagi sekalian alam..

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK DR. HAJI ABD LATIFF BIN AHMAD
[MERSING]
TARIKH : 06 DISEMBER 2018 (KHAMIS)

SOALAN NO. 33

Y.B. DATUK DR. HAJI ABD LATIFF BIN AHMAD [MERSING] minta **MENTERI KEWANGAN** menyatakan berapakah anggaran pendapatan bulanan kepada Kerajaan setelah perubahan cukai GST kepada SST. Berapa banyak barangan yang dikecualikan dari cukai SST serta berapakah jumlah kehilangan pendapatan kepada Kerajaan semasa *tax holiday* selama tiga bulan.

JAWAPAN

Tuan Yang di-Pertua,

1. Semasa pembentangan Belanjawan 2019 pada 2 November 2018, Kerajaan telah mengumumkan jumlah hasil Kerajaan Persekutuan bagi tahun 2018 dianggarkan sebanyak RM236.5 bilion. Daripada jumlah tersebut, hasil cukai adalah sebanyak RM174.7 bilion manakala hasil bukan cukai sebanyak RM61.8 bilion. Walaupun Cukai Jualan dan Barangan (GST) telah dimansuhkan dan hasil Kerajaan dianggar berkurang sebanyak RM21 bilion bagi tahun 2018, Kerajaan dijangka mengutip sebanyak RM4 bilion bagi tempoh September hingga Disember 2018 daripada pelaksanaan Cukai Jualan dan Cukai Perkhidmatan (SST).

2. Sehingga Oktober 2018, kutipan hasil daripada SST adalah berjumlah RM1.2 bilion. Manakala bagi tahun 2019, Kerajaan dijangka dapat mengutip hasil daripada SST sebanyak RM22 bilion. Bagi jumlah barang yang dikecualikan daripada SST, adalah dianggarkan sebanyak 5,445 barang dan perkhidmatan yang dikecualikan GST.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN ARTHUR JOSEPH KURUP
[PENSIANGAN]**

TARIKH : 6 DISEMBER 2018 (KHAMIS)

SOALAN NO. 34

Minta **MENTERI PENDIDIKAN** menyatakan :-

- (a) adakah pihak Kementerian akan meneruskan dasar 90:10 pengambilan guru anak tempatan bagi Sabah dan Sarawak; dan
- (b) berapa peratuskah yang sudah dicapai dan bilakah sasaran 90% untuk anak Sabah dan Sarawak itu akan dijangka akan tercapai.

JAWAPAN (a) dan (b)

Yang di-Pertua,

Pelaksanaan Dasar 90:10 akan diteruskan oleh pihak Kementerian Pendidikan Malaysia (KPM) sehingga mencapai sasaran seperti yang dihasratkan. Pencapaian Dasar 90:10 telah menunjukkan peningkatan sejak dilaksanakan iaitu daripada pengisian 79 peratus guru anak Negeri Sabah dan Sarawak pada tahun 2016 kepada pengisian 87 peratus guru anak Negeri Sabah dan 86 peratus guru anak Negeri Sarawak sehingga 1 Oktober 2018. Sasaran pencapaian 90 peratus pengisian guru anak negeri Sabah dan Sarawak di negeri masing-masing tersebut dijangka dapat dicapai pada tahun 2021.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL PERTAMA,
PARLIMEN KE EMPATBELAS**

PERTANYAAN : JAWAB LISAN

**DARIPADA : YB DATO' SRI DR. SHAHIDAN BIN KASSIM
(ARAU)**

TARIKH : 6 DISEMBER 2018

SOALAN : 35

Dato' Seri Dr. Shahidan bin Kassim [Arau] minta MENTERI DALAM NEGERI menyatakan penjelasan bilakah Kerajaan bercadang untuk menambah 6 buah helikopter di Sabah dan Sarawak. Pada masa ini APMM hanya mempunyai helikopter yang beroperasi dari Lapangan Udara Subang tetapi tiada di Sabah dan Sarawak seperti bomba.

JAWAPAN

Tuan Yang Di-pertua,

Untuk makluman Ahli Yang Berhormat dan Dewan Yang Mulia ini, ketika ini Agensi Penguatkuasaan Maritim Malaysia (APMM) telah memiliki lapan (8) aset udara iaitu dua (2) buah pesawat amfibi Bombardier dan enam (6) buah helikopter yang ditempatkan di Stesen Udara Maritim Subang, Lapangan Terbang Subang.

Ketika ini, APMM merancang untuk memperoleh aset atau pesawat udara yang baru bagi menampung keperluan pengoperasian di Sabah dan Sarawak. Justeru itu, perancangan memperoleh 4 buah pesawat helikopter dan 2 buah pesawat *Maritime Surveillance Aircraft* (MSA) telah dimajukan dalam perancangan pembangunan Maritim Malaysia di bawah RMK-11 (RP4). Bagi memastikan pengoperasian pesawat udara di Sabah dan Sarawak berjalan lancar, APMM turut memohon bagi pembinaan sebuah Stesen Udara di Labuan.

Sekiranya permohonan ini diluluskan oleh kerajaan tertakluk kepada kedudukan kewangan semasa, ia akan dilaksanakan bermula tahun 2019.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI HAJI TAJUDDIN
BIN ABDUL RAHMAN
[PASIR SALAK]**

TARIKH : 6 DISEMBER 2018 (KHAMIS)

SOALAN NO. 36

Minta **MENTERI PERUMAHAN DAN KERAJAAN TEMPATAN** menyatakan status **Projek Pembinaan Balai Bomba Daerah Kecil Kg. Gajah.**

JAWAPAN

Yang di-Pertua,

1. Untuk makluman Yang Berhormat, projek **Balai Bomba dan Penyelamat Kampung Gajah** telah selesai proses **tender semula** pada **21 November 2018**. Pihak agensi pelaksanaan iaitu **Jabatan Kerja Raya** sedang dalam proses **penilaian tender**. Pembinaan projek ini dijangka akan bermula pada **Januari 2019**. Tempoh pembinaan projek adalah selama **18 bulan** dan dijangka siap pada **pertengahan tahun 2020**.
2. Kawasan Kampung Gajah mendapat perlindungan kebakaran dari **Balai Bomba dan Penyelamat Seri Iskandar** dengan jarak perjalanan sejauh **36 kilometer**. Pada masa yang sama, kawasan tersebut juga mendapat bantuan kebombaannya daripada **Pasukan Bomba Sukarela Felcra Changkat Lada** dengan jarak perjalanan sejauh **10 minit**. Pasukan ini dianggotai seramai **20 orang ahli** dan dilengkapi dengan **kereta bomba sukarela jenis Proton Arena, pam angkut dan kelengkapan pemadaman** termasuk hos, nozel serta Peralatan Perlindungan Diri (*Personal Protective Equipment*) seperti helmet, baju dan kasut api.
3. Dengan beroperasinya Balai Bomba dan Penyelamat Kampung Gajah kelak, penduduk di kawasan tersebut akan mendapat perkhidmatan kebombaannya dengan **response time di bawah 10 minit**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN HASBI BIN HABIBOLLAH
[LIMBANG]
TARIKH : 06 DISEMBER 2018 (KHAMIS)

SOALAN NO. 38

Y.B. TUAN HASBI BIN HABIBOLLAH [LIMBANG] minta **MENTERI KEWANGAN** menyatakan apakah penyebab penyusutan nilai Ringgit Malaysia dan apakah langkah-langkah Kerajaan untuk menaikkan nilai Ringgit Malaysia.

JAWAPAN

Tuan Yang di-Pertua,

1. Sehingga 28 November 2018, nilai ringgit telah menyusut sebanyak 3.7% manakala nilai mata wang serantau yang lain telah menyusut sebanyak 1% hingga 6.7% berbanding dolar AS. Walau bagaimanapun, berbanding dengan mata wang serantau, prestasi ringgit adalah lebih stabil. Ringgit telah menambah nilai sebanyak 1.9% berbanding peso Filipina dan 3.8% berbanding rupiah Indonesia bagi tempoh yang sama.

2. Faktor utama kejatuhan nilai ringgit serta mata wang serantau kebelakangan ini adalah akibat aliran keluar dana asing yang didorong oleh faktor-faktor luaran, antaranya:

- ketidakstabilan pasaran dunia akibat risiko perang perdagangan (*trade war*) antara Amerika Syarikat – China;
- kenaikan kadar faedah oleh bank pusat Amerika Syarikat menyebabkan pelabur menilai dan mengimbangi semula kedudukan portfolio mereka dalam pasaran kewangan “ekonomi sedang pesat membangun” (*emerging economies*); dan
- kebimbangan mengenai risiko kesan penularan (*contagion effect*) dalam kalangan mata wang ekonomi sedang pesat membangun berikutan kejatuhan ketara peso Argentina dan lira Turki, yang telah menyusut nilai sebanyak 51.6% dan 27.3% masing-masing berbanding dengan dolar AS sehingga 28 November 2018.

Tuan Yang di-Pertua,

3. Dalam keadaan pasaran kewangan global yang tidak menentu ini, kadar pertukaran ringgit yang fleksibel telah memainkan peranan yang penting sebagai penyerap kejutan luaran tanpa menjejaskan aktiviti ekonomi domestik. Namun begitu, volatiliti ringgit yang ketara boleh menjejaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Oleh itu, Kerajaan akan sentiasa

memastikan keadaan pasaran kewangan lebih lancar dan mengambil langkah proaktif dengan memperkenalkan langkah-langkah untuk memastikan kecairan yang mencukupi, pasaran yang berdaya tahan dan mengurangkan aktiviti spekulasi dalam pasaran.

4. Liberalisasi progresif peraturan pentadbiran tukaran asing juga menghasilkan lebih banyak rizab yang tidak berpusat. Perkara ini dicerminkan dalam peningkatan pemerolehan aset di luar negara oleh bank dan korporat pemastautin. Secara khususnya, bank dan korporat pemastautin memegang tiga perempat daripada aset luar negeri Malaysia yang boleh digunakan untuk memenuhi obligasi hutang luar negeri tanpa membuat sebarang tuntutan ke atas rizab antarabangsa BNM.

Tuan Yang di-Pertua,

5. Kesan kejatuhan nilai mata wang ringgit terhadap inflasi keseluruhan pada sembilan bulan pertama 2018 juga kekal rendah, memandangkan harga bahan api yang diimport telah ditetapkan sejak akhir Mac 2018. Di samping itu, barangan import lain hanya mencakupi sebahagian kecil daripada penggunaan dalam negeri. Sebagai contoh, bahan mentah dan bahan pengantara yang diimport hanya mencakupi sekitar 20% daripada jumlah pengeluaran produk dalam Indeks Harga Pengguna Malaysia (IHP). Tidak termasuk bahan api, import barangan siap pula mencakupi 7% daripada bakul IHP. Untuk makluman Ahli Yang Berhormat, kadar inflasi bagi tempoh Mei 2018 hingga Oktober 2018 adalah seperti berikut:

Bulan	Kadar Inflasi (%)
Mei 2018	1.8
Jun 2018	0.8
Julai 2018	0.9
Ogos 2018	0.2
September 2018	0.3
Oktober 2018	0.6

6. Dalam jangka masa panjang, nilai ringgit akan didorong terutamanya oleh kekuatan asas ekonomi negara. Sehubungan itu, Malaysia perlu menumpukan usaha untuk meningkatkan daya tahan ekonomi dengan mempelbagaikan sumber ekonomi, memperkukuh daya saing ekonomi dan kedudukan fiskal negara. Paras rizab antarabangsa BNM pula dijangka akan disokong dengan pemulihan kestabilan pasaran dunia, penambahbaikan sentimen pelabur dan lebih akaun semasa negara yang kekal positif. Dengan ini, prestasi ringgit, rizab negara dan pasaran modal akan terus meningkat seiring dengan pengukuhan asas ekonomi negara dan pasaran kewangan global.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI MUSTAPA BIN MOHAMED
[JELI]**

TARIKH : 6 DISEMBER 2018 (KHAMIS)

SOALAN NO. 39

Minta **MENTERI HAL EHWAL EKONOMI** menyatakan senarai projek-projek pembangunan melebihi RM50 juta di Kelantan yang sudah diluluskan oleh Kerajaan terdahulu yang kini sedang dikaji semula serta apakah projek-projek ini akan dilaksanakan.

JAWAPAN

Tuan Yang di-Pertua,

Untuk makluman Ahli Yang Berhormat, selaras dengan keputusan Kerajaan agar kategori projek mengikut keutamaan yang memberikan manfaat terus kepada rakyat diteruskan, surat arahan Kementerian Kewangan bertarikh 29 Jun 2018 Arahan Penambahbaikan Tadbir Urus Dan Pelaksanaan Perolehan Kerajaan tersebut telah menggariskan pematuhan seperti berikut:

- a) Projek-projek yang belum dikeluarkan SST dibatalkan atau ditangguhkan;
- b) Bagi projek-projek yang telah dikeluarkan SST, projek bernilai RM10 juta ke bawah boleh diteruskan; dan
- c) Bagi projek-projek yang telah dikeluarkan SST, projek bernilai RM10 juta ke atas boleh diteruskan dengan syarat kemajuan pelaksanaan tidak kurang 15%. Sekiranya di bawah 15%, projek hendaklah dikaji semula melalui Contract Coordination Panel (CCP) Kementerian pelaksana masing masing. CCP akan menimbang dan memutuskan kesesuaian pelaksanaan atau penamatan kontrak dengan mengambil kira jumlah pampasan yang perlu ditanggung oleh Kerajaan.

Berdasarkan sesi libat urus *Contract Coordination Panel* (CCP) Khas Kementerian sehingga 31 Oktober 2018, semakan semula pelaksanaan projek-projek di bawah Belanja Pembangunan negeri Kelantan mendapati sebanyak 9 projek daripada 60 projek yang diluluskan bernilai RM50 juta dan ke atas dengan kos sebanyak RM1.95 bilion telah ditangguhkan pelaksanaannya iaitu projek-projek yang belum dikeluarkan Surat Setuju Terima (SST).

Walau bagaimanapun, Kerajaan dari semasa ke semasa mengadakan semakan semula sama ada meneruskan, menangguh dan membatalkan pelaksanaan sesuatu projek di bawah Belanja Pembangunan berdasarkan keperluan, keutamaan pelaksanaan dan kemampuan kewangan Kerajaan pada masa akan datang.

Sekian, terima kasih.

6 Disember 2018

Kementerian Hal Ehwal Ekonomi

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATO' HAJI SALIM SHARIF
[JEMPOL]**

TARIKH : 6 DISEMBER 2018 (KHAMIS)

SOALAN : 40

minta **MENTERI PEMBANGUNAN LUAR BANDAR** menyatakan status terkini pelaksanaan Projek Pemasangan Lampu Jalan Kampung dan jangkaan masa untuk projek ini siap sepenuhnya agar dapat dimanfaatkan oleh sekitar 2.5 juta penduduk kampung di seluruh negara.

JAWAPAN

Tuan Yang Di-Pertua,

Untuk makluman Yang Berhormat, sehingga 12 Oktober 2018, status terkini pelaksanaan Projek Pemasangan Lampu Jalan Kampung (LJK) adalah sebanyak 23,905 unit atau 68.3% yang telah siap dipasang daripada jumlah keseluruhan 35,010 unit. Kerja-kerja pemasangan sedang digiat dijalankan dan dijangka siap sepenuhnya menjelang Februari 2019.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DATO' SIVARRAAJH CHANDRAN

TARIKH : 06 DISEMBER 2018

SOALAN :

Dato' Sivarraajh Chandran [Cameron Highlands] minta **MENTERI TENAGA MANUSIA** menyatakan justifikasi disebalik keputusan Kerajaan untuk mengenakan RM 10,000.00 sebagai cas levi pekerja asing yang mana perlu ditanggung 100% oleh para majikan. Adakah langkah ini diambil setelah mengadakan sebarang perbincangan bersama para peniaga.

PR-1412-L02749

JAWAPAN

Tuan Yang Di Pertua,

1. Objektif utama pelaksanaan dasar ini adalah untuk membolehkan majikan mengekalkan pekerja asing yang telah pun mempunyai kemahiran tinggi khususnya dalam sektor-sektor tertentu seperti pembinaan dan perkilangan. Pelaksanaan dasar ini juga dijangka akan meningkatkan produktiviti dan daya saing industri serta memberi pulangan yang tinggi kepada majikan. Selain itu, pengenaan bayaran levi kepada majikan juga adalah selaras dengan konvensyen antarabangsa yang menetapkan bayaran-bayaran seumpama levi tidak boleh dikenakan kepada pekerja.

2. Kerajaan turut ingin menegaskan bahawa pelaksanaan dasar levi RM10,000 ini adalah bukan mandatori. Ini memandangkan majikan mempunyai opsyen sama ada untuk mengekalkan pekerja asing tersebut secara berterusan untuk tempoh maksimum 3 tahun lagi dan membayar levi RM10, 000 atau boleh menghantar pulang pekerja tersebut ke negara asal dan datang semula sebagai pekerja baharu dan membayar levi RM1,850 berdasarkan prosedur sedia ada.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN
DARIPADA : YB DATUK ROZMAN BIN ISLI
[LABUAN]
TARIKH : 6 DISEMBER 2018 (KHAMIS)

SOALAN NO. 42

Minta **PERDANA MENTERI** menyatakan apakah perancangan jangka masa panjang untuk penduduk berstatus IMM13 yang tinggal di kawasan 'Penempatan' kelolaan Majlis Keselamatan Negara (MKN) di Labuan. Untuk pengetahuan, penempatan ini telah dikenal pasti oleh Jabatan Kesihatan sebagai kawasan berisiko tinggi beberapa jenis wabak penyakit.

JAWAPAN

Tuan Yang di-Pertua,

1. Kerajaan sentiasa berusaha untuk menangani isu penduduk berstatus pemegang dokumen IMM13 yang tinggal di kawasan penempatan pelarian di Labuan iaitu di Kg. Kiamsam dan Kg. Muslim. Dalam hal ini, tapak penempatan bagi pelarian ini perlu bersifat kekal bagi memastikan supaya perancangan untuk menambah baik persekitaran penempatan mereka boleh dilaksanakan dengan lebih berkesan.
2. Perancangan tersebut melibatkan susunan rumah, sistem sanitasi dan sistem perparitan yang betul dan teratur. Pada masa yang akan datang juga, penduduk tidak lagi dibenarkan membina dan membesarkan kawasan rumah sesuka hati tanpa kebenaran Pihak Berkuasa berkaitan.
3. Dalam pada itu, isu wabak pula akan diatasi dengan kerjasama penduduk, Jabatan Kesihatan Wilayah Persekutuan dan Perbadanan Labuan. Namun usaha oleh Kerajaan ini perlu disokong oleh pemimpin setempat untuk menyediakan kehidupan yang lebih selesa demi kesejahteraan penduduk di kawasan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI JALALUDDIN BIN HAJI ALIAS
[JELEBU]**

TARIKH : 06 DISEMBER 2018 (KHAMIS)

SOALAN NO. 43

Minta **MENTERI HAL EHWAL EKONOMI** menyatakan adakah terdapat perancangan bagi merombak semula tafsiran miskin dan miskin bandar seiring dengan kenaikan kos sara hidup yang tinggi ketika ini.

JAWAPAN

Yang di-Pertua,

Untuk makluman Ahli Yang Berhormat,

Pendapatan Garis Kemiskinan (PGK) dikemas kini setiap kali Kerajaan menerbitkan laporan Penyiasatan Pendapatan Isi Rumah dan Kemudahan Asas (PPIR & KA). Penyiasatan ini dilaksanakan dua kali dalam tempoh lima tahun. Laporan yang terkini diterbitkan pada tahun 2016 manakala laporan seterusnya akan diterbitkan pada tahun 2020.

PGK Mengikut Wilayah Dan Strata tersebut adalah seperti jadual dibawah:

PGK Mengikut Wilayah & Strata, Malaysia (RM)

	2014	2016
Malaysia	950	980
Bandar	960	990
Luar bandar	910	930
Semenanjung	930	960
Bandar	940	970
Luar bandar	870	880
Sabah	1,170	1,180
Bandar	1,160	1,170
Luar bandar	1,180	1,220
Sarawak	990	1,020
Bandar	1,040	1,070
Luar bandar	920	9,40

Sumber: Penyiasatan Pendapatan Isi Rumah dan Kemudahaan Asas, 2014 & 2016

Kerajaan akan mengkaji semula model PGK yang digunakan supaya lebih mencerminkan corak penggunaan dan kos sara hidup semasa. Ini termasuk mempertimbang sekiranya terdapat keperluan bagi menetapkan PGK mengikut bandar dan luar bandar di Semenanjung serta di Sabah dan Sarawak. Dengan kajian semula ini, semua isi rumah yang dikategorikan sebagai miskin, termasuk miskin bandar, akan layak mendapat bantuan yang diperlukan.

Dalam kajian ini, faktor-faktor selain daripada pendapatan seperti pendidikan, kesihatan dan taraf hidup akan diteliti dalam menghasilkan indeks kemiskinan yang baharu. Indeks ini dinamakan MPI akan memberikan tafsiran yang lebih baik bagi isi rumah miskin dan miskin tegar serta lebih bersasar.

Sekian, terima kasih.

6 Disember 2018

Kementerian Hal Ehwal Ekonomi